

宋

史

七六

列傳卷第十三

宋史二百五十四

開府儀同三司上贊國錄軍國事書前書奏丞相監修國史領經筵事都總裁臣脫等奉

勅修

侯益

孫延矩、寶、廣、

張從恩

扈彥珂

薛懷讓

趙贊

李繼勳

藥元福

趙晁

子延溥

侯益汾州平遙人祖父以農為業唐光化中李克用據太原益以拳勇隸麾下從莊宗攻大名先登擒軍校擢為馬前直副兵馬使征劉守光先登遷軍使破潞州為機石傷足莊宗親以藥傅其瘡及愈改護衛

指揮使梁小將李立李建以驍勇聞軍中憚之會莊宗與梁人戰河上益挺身出鬪擒其二將遷馬前直指揮使莊宗入汴為本直副都校從明宗討趙在禮於鄆會諸軍推戴明宗益脫身歸洛莊宗撫其背涕明宗立益面縛請罪明宗曰爾盡忠節又何罪也改本直左廂都校天成初朱守殷據夷門叛益率所部斬關先入轉左右馬前從馬直都校領潘州刺史王都據定州叛益從王晏球攻討會契丹來援益逆擊之破其衆唐河北克其城授寧州刺史入為羽林軍五十指揮都校領費州刺史時夏帥李仁福卒子

彝超擅命自立以邀節鉞命益帥師討之明宗不豫
遽追還應順初潞王舉兵鳳翔以益為西面行營都
虞候益知軍情必變稱疾不奉詔執政怒出為商州
刺史蜀軍寇金州益率鎮兵襲擊大破之詔賜襲衣
名馬加西面行營都巡檢使晉初召為奉國都校領
光州防禦使范延光反大名張從賓據河陽為聲援
晉祖召益謂曰宗社危若綴旒卿能為朕死耶益曰
願假銳卒五千人破賊必矣以益為西面行營副都
部署率禁兵數千人次虎牢從賓軍萬餘人夾汜水
而陣益親鼓士乘之大敗其衆擊殺殆盡汜水為之

不流從賓乘馬入水溺死築京觀刻石紀功晉祖大喜拜河陽三城節度克鄆都行營都虞候會延光以城降移鎮潞州天福四年晉祖追念虎牢之功遷武寧軍節度同平章事遣中使謂益曰朕思卿前年七月九日大立戰功故復以此月此日徙卿鎮彭門領相印仍賜門戟改鄉里為將相鄉勲賢里九月徐州大火益出金粟振之明年徙鎮秦州克西面都部署階州義軍校王君懷苦其刺史暴虐率衆數千投蜀請為先鋒下秦成諸州益聞之懼請援於朝又潛遣書於蜀將以達誠意少帝聞之疑為邊患議徙於內

地會蒲帥安審琦移鎮許下以益為河中尹護國軍
節度契丹入汴益率僚屬歸京師詣契丹主自陳不
預北伐之謀契丹授以鳳翔節度漢祖即位加兼侍
中益自以嘗受契丹命聞漢兵入洛憂之浚城隍為
備孟昶遣益所親掌樞密王回齋書招益復遣綿州
刺史吳崇惲厚遺之崇惲本秦州押衙益故吏也及
何重建為帥遣崇惲奉表以階秦歸蜀授刺史故昶
遣之益遂與其子歸蜀昶令重建率川兵數萬出大
散關以應之漢祖知其事遣客省使王景崇率禁軍
數千倍道趨岐下召益入朝時漢祖已不豫召至卧

內謂之曰侯益貌順朝廷心懷携貳爾往至彼如益來即置勿問苟遲疑不決即以便宜從事景崇至京兆合岐雍邠涇之師以破蜀軍益懼即謀入朝會聞漢祖崩景崇欲誅益慮隱帝不知先朝密旨從事程渥景崇里人也益因遣之說景崇曰君致位通顯亦可小知止足何必懷禍人之心為已甚之事平況侯君親戚爪牙甚衆事若妄發禍亦旋踵至矣景崇怒曰子去勿為游說吾將族爾益知不用渥言即率數十騎奔入朝隱帝遣侍臣問益結連蜀軍之由益對曰臣欲誘之出關掩殺之耳隱帝笑之益厚賂史弘

肇輩言景崇之橫怒諸權貴深庇護之乃授以開封尹兼中書令俄封魯國公景崇聞之遂據城叛益親屬在城中餘七十口悉為景崇所害及周祖起兵隱帝議出師禦之益獻計曰王者無敵於天下兵不宜輕出况大名戍卒家屬盡在京城不如閉關以挫其銳遣其母妻發降以招之可不戰而定慕容彥超以為益衰老作懦夫計沮之隱帝遣益與彥超及張彥超閻進卿吳慶裕守澶州至赤岡周師奄至戰留子陂漢軍不利益臨陣見士卒無鬪志又占候不祥乃與焦繼勲等夜謁周祖周祖慰勞遣還廣順初封楚

國公改太子太師俄又改封齊國公顯德元年冬告老以本官致仕歸洛遣使賜茶藥錢帛就撫問之太祖即位遺賜器幣歲一來朝太祖以耆舊厚待之乾德初郊祀詔綴中書門下班禮與丞相等三年卒年八十贈中書令五子仁愿仁矩仁寶仁遇仁興仁愿至左金吾衛大將軍蓬州刺史仁遇西京內園使仁興右屯衛將軍仁愿子延濟西京作坊使康州刺史仁矩從益為商州牙校益之討張從賓也仁矩首犯賊鋒以功領蓬州刺史充河南牙職從益歷潞徐秦三鎮開運初入為檀趨使出為天平行軍司馬漢初

授隰州刺史至郡決滯訟一日釋繫囚百餘獄為之空民情悅服仕周歷左羽林將軍出為泗州刺史改通州兼屯田鹽鐵監使宋初歷折雄二州刺史治軍有方略歷數郡咸有善政開寶二年卒年五十六太祖甚惜之特命中使護喪子延廣延之咸平二年進士及第

仁寶以蔭遷太子中允即趙普妹婿盧多遜與普有隙普罷相即以仁寶知邕州州之右江生毒藥樹宣化縣人常採貨之仁寶以聞詔盡伐去九年不代太平興國中上言陳取交州之策太宗大喜令馳驛召

歸多遜遽奏曰若召仁寶其謀必泄蠻夷增備未易
取也不如授仁寶飛輓之任且經度之別遣偏將發
荆湖士卒一二萬人長驅而往勢必萬全帝以為然
遂以仁寶為交州水陸計度轉運使前軍發遇賊鋒
甚盛援兵不繼遇害死江中太宗聞之甚悼惜特贈
工部侍郎錄其子延齡延世並為齊郎延齡至殿中
丞延世至太子中舍

延廣初在襁褓中遭王景崇之難乳母劉氏以己子
代延廣死劉氏行丐抱持延廣至京師還益延廣父
歷通祁雄三州刺史悉以補牙職仁矩在雄州日方

飲宴虜數十騎白晝入州城居民驚擾延廣引親信
數騎馳出衙門射殺其酋長一人斬首數級悉禽其
餘黨延廣持首級以獻仁矩喜拊其背曰興吾門者
必汝也監軍李漢超以其事聞詔書褒美賜錦袍銀
帶仁矩卒補西頭供奉官從党進討太原太平興國
初預修永昌陵出護延州軍兼緣邊巡檢善撫士卒
下樂為用戎人畏服遷閣門祗候會西北戎入寇邊
人擾亂求可使徼巡者近臣言延廣將家子習邊事
無出其右延廣時被病強起之遷崇儀副使充同鄜
坊延丹緣邊都巡檢使延廣力疾入辭太宗賜以名

藥及方遣太醫隨侍其疾亦尋愈戎人聞延廣之至
不敢復為寇亂叛卒劉渥嘯聚亡命數百人寇耀州
富平縣謀入京兆其勢甚盛所過殺居民奪財物縱
火而去關右騷然延廣率兵數百自間道追之會渥
於富平西十五里渥衆已千餘人相持父之渥素憚
延廣傳言我草間求活觀死如鴻毛耳侯公家世富
貴奈何不思保守而與亡卒爭一旦之命於鋒鏑之
下延廣怒因擊之挺身與渥鬪大樹下斷渥右臂渥
脫走乘勢大破其衆渥創甚止谷中後數日為追兵
所獲渥素號驍勇無敵至是為延廣所殺群盜喪氣

餘黨稍稍自歸關右以定上嘉之擢拜崇儀使淳化
二年李繼遷始擾夏臺即命延廣領燐州刺史知靈
州賜金帶名馬會趙保忠陰結繼遷朝廷命騎將李
繼隆率兵問罪以延廣護其軍既而夏臺平保忠就
縛手詔褒美錫賚甚厚師還留為延州鉞轄會節帥
田重進老耄郡中不治以延廣同知州事兼緣邊都
巡檢使先是延廣知靈州部下嚴整戎人悅服李繼
遷素避其鋒監軍康贊元害其功誣奏延廣得虜情
恐後倔強難制遽詔還以慕容德豐代之部內甚不
治至道間繼遷寇靈州朝廷謀帥同知樞密院事錢

若水稱延廣可使就拜寧州團練使知靈州兼兵馬都部署賜白金二千兩歲增給錢二百萬戎入塞道郵傳餽餌皆不通延廣獨引數十騎之鎮戎人素服其威名皆相率引避二年春被病上遣御醫馳驛視之醫至疾已亟延廣謂中使李知信曰延廣自度必不起家世受國恩今日得死所矣但恨未立尺寸功以報上耳言訖而卒年五十上聞之為出涕贈賈誼甚厚以其子為六品正員官子紹隆東染院使帶御器械紹隆子宗亮右侍禁閭門祇候

張從恩并州太原人父存信振武軍節度後唐明宗

微時嘗隸存信麾下時從恩尚幼頗無賴明宗甚薄之及即位止授散秩從恩不得志乃退歸太原晉祖鎮河東為少帝娶從恩女晉初以外戚擢為右金吾衛將軍未幾改刺貝州遷北京副留守移授澶州防禦使歷樞密副使宣徽南院使權西京留守俄判三司安從進叛于襄陽以從恩為行營兵馬都監少帝嗣位襄陽平遷檢校太尉開封尹充東京留守少帝自鄴歸汴改鄴都留守錫賚加等仍賜銀裝肩輿二俾迎其家明年契丹擾河朔從恩僅能完守尋加同

中書門下平章事是歲契丹將趙延昭據甘陵命從

恩為貝州行營都部署從恩至延昭道去詔與杜重威合兵三萬北伐開運初改天平軍節度契丹復擾邊命十五將北征以從恩充北面行營都監二年移鎮晉州又改潞州及契丹入汴從恩欲降從事高防諫曰公晉室之親宜盡臣節從恩不聽乃棄城而去巡檢使王守恩悉取其家財以城歸漢祖漢祖至汴從恩惶懼不敢出漢祖召賜襲衣金帶鞍勒馬器幣以安慰之尋拜右衛上將軍奉朝請周初遷左金吾衛上將軍周祖征兗州從恩從行世宗嗣位加檢校太師封褒國公宋初改封許國公父之以病免乾德

四年卒年六十九

扈彥珂代州鴈門人幼事王建立以謹厚稱晉天福中建立節制潞州卒遺表薦彥珂得補河東節度左都押衙會漢祖自太原建號擢為宣徽南院使未幾授鎮國軍節度華商等州觀察處置等使乾祐初河中李守貞永興趙思綰鳳翔王景崇並據城叛周祖為樞密使總兵出征道出華州時議多以先討景崇思綰為便周祖意未決彥珂曰三叛連衡推守貞為主宜先擊河中河中平則永興鳳翔失勢矣今捨近圖遠若景崇思綰逆戰于前守貞兵其後腹背受敵

為之祭何周祖從其言及平河中以功遷護國軍節
度時蒲人彫弊思得良帥鎮撫彥珂暗弱朝議少之
廣順初就加同平章事移鎮滑州歲餘代歸與鳳翔
趙暉俱獻繒帛請開宴不納以滑州李守貞宅賜之
世宗嗣位授左衛上將軍顯德三年以老疾上章求
退授開府儀同三司太子太師致仕歸西京太祖即
位遣使就賜器幣數月卒年七十五

薛懷讓其先戎人徙居太原少勇敢喜戰鬪後唐莊
宗在鎮得隸帳下累歷軍職明宗時改神武右廂都
校領冀州刺史東川董璋遣懷讓率本軍從晉祖討

賊平遷絳州刺史清泰初移申州明年表乞罷郡
赴代北軍力陳不允晉天福中范延光叛於鄆以懷
讓為招牧使及戰中流矢詔賜湯藥存問又歷沂遼
密懷四州刺史所至無善政頗事誅斂楊光遠反青
州召懷讓至闕賜襲衣玉帶為行營先鋒都指揮使
以功改宿州團練使會契丹南侵少帝幸澶州遣懷
讓與李守貞皇甫遇梁漢璋率兵萬人緣河而下以
守汶陽時契丹歲擾邊陲朝廷擇驍將守要郡命懷
讓為洛州團練使會符彥卿北討契丹以懷讓為馬
軍左廂排陣使又從北面都招討杜重威為先鋒都

指揮使及重威降契丹於中渡橋懷讓亦在籍中非其志也契丹主北歸留麻答守鎮州麻答遣步健督洛州供運懷讓聞漢祖舉義晉陽即殺步健奉表歸漢漢祖遣郭從義分兵萬餘與懷讓取邢州時偽帥劉鐸守邢臺堅壁拒之不克而還麻答遣副將楊安以八百騎攻懷讓又命剛鐵將三百騎繼之懷讓戰不勝退保本州契丹大掠其封內及麻答為鎮軍所逐楊安亟遁鐸又納款漢祖懷讓乘其不虞遣人給鐸云我奉詔為邢州帥今率衆襲契丹請置頓于郡鐸無拒心輒開門迎之懷讓殺鐸奪其城漢祖即授

以安國軍節度隱帝即位移鎮同州及殺楊邠等急
召懷讓至闕會北郊兵敗懷讓降于周祖周祖登位
賜襲衣金帶鞍勒馬遣還任加同平章事劉崇入寇
懷讓表求西征詔褒之夏陽富人張廷徽誣告趙隱
等五人為盜殺人且厚賂懷讓子有光懷讓知之即
諷吏掠治隱等強伏之遣掌書記李炳親校賈進蒙
追判官劉震等鋟成其獄隱等皆棄市家人詣闕訴
冤懷讓亦自入朝遽獻錢百萬請開宴不納俄捕獲
本賊下御史臺鞫問懷讓懼懼獻馬十匹復不納有司
請逮懷讓繫獄周祖以宿將釋不問杖流震等俄以

懷讓為左屯衛上將軍世宗即位加左武衛上將軍顯德五年請老拜太子太師致仕恭帝即位封杞國公建隆元年卒年六十九贈侍中懷讓好畜馬驅馬有大烏小鳥者尤奇駿漢隱帝使求之吝而不獻及罷節鎮環衛祿薄猶有馬百匹橐駝三十頭傾資以給芻粟朝夕閱視為娛家人屢勸鬻以供費懷讓不聽及死童僕皆勞而以哭蓋其俗也

趙贊字元輔本名羨後改焉幽州蔚人祖德鈞後唐盧龍節度封北平王父延壽尚明宗女興平公主至樞密使忠武軍節度贊幼聰慧明宗甚愛之與諸孫

外孫石氏並育於六宅暇日因遍閱諸孫數十人目
贊曰是兒令器也贊七歲誦書二十七卷應神童舉
明宗詔曰都尉之子太尉之孫幼能誦書弱不好弄
克彰庭訓宜錫科名可特賜童子及第仍附長興三
年禮部春榜父之延壽出鎮宣武軍因奏署牙內都
校清泰末晉祖起并門命延壽以樞密使將兵屯上
黨德鈞將本軍自幽州來會時晉祖以契丹之援引
兵南下德鈞父子降晉契丹主盡錮之北去贊獨與
丹署為金吾將軍數年契丹以延壽為范陽節度又

署贊為牙內都校開運末契丹主將謀南侵委政延壽及平原陷贊復受契丹署為河中節度延壽從契丹北歸贊得留鎮河中未幾漢祖起晉陽贊奉表勸進漢祖加檢校太尉仍鎮河中改京兆尹晉昌軍節度贊懼漢疑已潛遣親吏趙仙奉表歸蜀判官李恕者本延壽賓佐深所委賴至家事亦參之及贊出鎮從為上介至是怒語贊曰燕王入遼非所願也漢方建國必務懷柔公若泥首歸朝必保富貴狼狽入蜀理難萬全儻復不容後悔無及公能聽納請先入朝為公申理贊即遣怒詣闕漢祖見怒問贊何以附蜀

恕曰贊家在燕薦身受契丹之命自懷憂恐謂陛下終不能容招引西軍蓋圖苟免臣意國家甫定務安臣民所以令臣乞哀求覲漢祖曰贊之父子亦吾人也事契丹出於不幸今聞延壽落於陷棄吾不忍不容贊耶恕未還贊已離鎮入朝即命為左驍衛上將軍徙怒邠州判官贊仕周歷左右羽林左龍武三統軍世宗南征初遣贊率師巡警壽州城外俄命為淮南道行營左廂排陣使世宗歸京留贊與諸將分兵圍壽春贊獨當東面諸將戰多不利贊獨持重自秋涉冬未嘗挫効及受詔移軍尺椽片瓦悉輦而行城中

人無敢睥睨者會吳遣驍將魯公綰帥十餘萬衆泝淮奄至跨山為柵阻肥水俯瞰城中時大軍已解圍贊與大將楊承信將輕騎斷吳人饑路又獨以所部襲破公綰軍為流矢所中世宗再征壽春命造橋渴口以通濠泗令騎帥韓令坤董其役俾贊副之屬霖雨淮水漲溢濠人謀乘輕舟畚焚其橋贊覘知之設伏橋下濠人果至贊令強弩亂發殺獲甚衆及世宗移兵趣濠以牛革蒙大盾攻城贊親督役矢集于胄雖被重傷猶力戰遂拔其羊馬城刺史唐景思死焉團練使郭延請以城降世宗詔褒美之又以所部兵

巡撫滁和之間破吳人五百于石潭橋淮南平以戰功多授保信軍節度贊入視事盡去苛政務從寬簡居民使之恭帝即位加開府階宋初加檢校太師移忠正軍節度預平維揚歲餘改鎮延州受密旨許以便宜行事將及州境乃前後分置步騎綿綿不絕林莽之際遠見旌旗所部羌渾來迎無不懾服乾德六年移建雄軍節度秋命將征太原以贊為邠州路部署開寶二年太祖將討晉陽又以為河東道行營前軍馬步軍都虞候車駕薄城下分軍四面贊扼其西偏并人乘晦自突門潛犯贊壘贊率衆擊之久而方

退弩矢貫足太祖勞問數四賜良藥傳之四年改鎮鄆州太宗即位進封衛國公太平興國二年來朝未見而卒年五十五贈侍中贊頗知書喜為詩容止閑雅接士大夫以禮馭衆有方略其為政雖無異跡而吏民畏服亦近代賢帥也

李繼勲大名元城人周祖領鎮選隸帳下廣順初補禁軍列校累遷至虎捷左廂都指揮使領永州防禦使顯德初遷侍衛步軍都指揮使領昭武軍節度歲餘改領曹州世宗親征淮上令繼勲領兵屯壽州城南進洞屋雲梯以其城繼勲急於守禦為其所敗

死者數萬梯屋悉皆被焚召歸闕出為河陽三城節
度議者以為失責帥之義及再幸壽春回左授繼勲
右武衛大將軍又以其掌書記陳南金裨贊無狀弁
黜之顯德四年冬復從世宗南征及次迎鑾即命繼
勲帥黑龍船三十艘於江口灘敗吳兵數百獲戰船
二艘以功遷左領軍衛上將軍七月改右羽林統軍
六年春世宗幸滄州以繼勲為戰權左廂都部署前
澤州刺史劉洪副之俄權知邢州恭帝即位授安國
軍節度加檢校太傅宋初加檢校太尉太祖平澤潞
繼勲朝于行在即以為昭義軍節度是秋率師入河

東燔平遙縣俘獲甚衆建隆二年冬又敗弁軍千餘人斬首百餘級獲其遼州刺史傅延彥及弟延勲來獻乾德二年詔與康延沼尹訓率步騎萬餘攻遼州太原將郝貴超領兵來援戰于城下繼勲大敗之州將杜延韜危蹙與拱衛都指揮使冀進兵馬都監供奉官侯羨籍部下兵三千送欵於繼勲即遣內供奉官都知慕容延忠入奏詔褒之未幾弁人誘契丹步騎六萬人來取遼州復遣繼勲與羅彥瓌郭進曹彬等領六萬衆赴之大破契丹及太原軍於城下五年加同平章事開寶初將征河東以繼勲為行營前軍

都部署敗奔入於渦河二年太祖親征河東命繼勲為行營前軍都部署駕至城下分軍四面繼勲掘其南三年春移鎮大名太平興國初加兼侍中俄以疾求歸洛陽許之賜錢千萬白金萬兩是秋上表乞骸骨拜太子太師致仕朝會許綴中書門下班尋卒年六十二贈中書令繼勲累歷藩鎮所至無善政然以質直稱信奉釋氏與太祖有舊故特承寵遇弟繼偓亦有武勇周顯德末補內殿直宋初累歷軍職開寶中為步軍副都軍頭太平興國三年遷內外馬步軍副都軍頭坐事改右衛率府率六年加本衛將軍領

獎州刺史累至龍衛右廂都指揮使領本州團練使
繼勳子守恩至如京使守元至北作坊使守徽為崇
儀副使

藥元福并州晉陽人幼有膽氣善騎射初事邢帥王
檀為廳頭軍使以勇敢聞事後唐為拱衛威和親從
馬鬪軍都校天平軍內外馬軍都指揮使晉天福中
為深州刺史開運初契丹陷甘陵圍魏郡師次於河
少帝駐軍澶淵契丹陣於城北東西連亘掩城兩隅
登陴望之不見其際元福以左千牛衛將軍領兵居
陣東偏澶民有馬破龍者告契丹曰先攻其東即浮

梁可奪契丹信之盡銳來戰元福與慕容鄴各領二百騎為一隊躍出而鬪元福奮鐵錐擊契丹斃者數人左右馳突無不披靡契丹兵潰少帝登城見元福力戰召撫之曰汝奮不顧命雖古之忠烈無以過之元福三馬皆中流矢少帝擇名馬賜之明日將戰面授元福鄭州刺史為權臣所沮止刺原州俄改泰州明年契丹復入命元福與李守貞符彥卿皇甫遇張彥澤等禦之於陽城為右廂副排陣使晉師列方陣設拒馬為行砦契丹以奇兵出陣後斷糧道晉人乏水士馬飢渴鑿井未及泉土輒壞塞契丹順風揚塵

諸將皆曰彼勢甚銳俟風反與戰破之必矣守貞與元福謀曰軍中飢渴已甚若俟風反出戰吾屬為虜矣彼謂我不能逆風以戰宜出其不意以擊之此兵家之奇也元福乃率麾下騎開拒馬出戰諸將繼至契丹大敗追北二十餘里殺獲甚衆敵帥與百餘騎遁去以元福為威州刺史會靈武節度王令溫以漢法治蕃部西人苦之共謀為亂三族酋長拓跋彥超石存也彌彊率衆攻靈州令溫遣人間道入奏乃以河陽節度馮暉鎮朔方召關右兵進討以元福將行營騎兵元福與暉出威州土橋西遇彥超兵七千餘

邀暉行李元福轉戰五十里殺千級禽三十餘人又遣部校援出令溫護送洛下朔方距威州七百里無水草號旱海師湏齋糧以行至耀德食盡比明行四十里彥超等衆數萬布為三陣扼要路據水泉以待暉軍軍中大懼暉遣人賂以金帛求和解彥超許之使者往復數四至日中列陣如故元福曰彼知我軍飢渴邀我於險既許和解而日中未決此豈可信哉欲困我耳遷延至暮則吾黨成禽矣暉驚曰奈何元福曰彼雖衆而精兵絕少依西山為陣者是也餘不足患元福請以麾下騎先擊西山兵公但嚴陣不動

俟敵少却當舉黃旗為號旗舉則合勢進擊敗之必
矣暉然其策遂率衆進擊敵衆果潰元福即舉黃旗
以招暉暉軍繼進彥超大敗橫尸蔽野是夕入清邊
軍明日至靈州元福還郡詔賜暉元福衣帶繒帛銀
器漢乾祐中從趙暉討王景崇於鳳翔時兵力寡弱
不滿萬人蜀兵數萬來援景崇至寶雞依山列柵都
監李彥從以數千人擊蜀軍衆寡不敵漢軍少却元
福領數百騎自後驅之下令還顧者斬衆皆殊死戰
大敗蜀兵追至大散關殺三千餘人餘皆棄甲遁去
鳳翔平以功遷淄州刺史周廣順初王彥超討徐州

叛將楊溫以元福為行營兵馬都監數月克之率師還京改陳州防禦使未幾劉崇引契丹擾晉州命樞密使王峻率兵拒之以元福為西北面都排陣使軍過蒙坑崇夜燒營遁峻令元福與仇超陳思讓追至霍邑旣行又遣止之元福謂思讓等曰劉崇召契丹擾邊志在疲弊中國今兵未交而遁宜追奔深入以挫其勢諸將畏懦遂止周祖知其事明年因調兵戍晉州謂左右曰去年劉崇之遁若從樂元福之言則無邊患矣俄與曹英向訓討慕容彥超於兗州元福為行營馬步軍都虞候詔元福自晉州率所部入朝

即遣東行賜六銖袍帶鞍馬器仗周祖謂曰比用曹州防禦使鄭璋我度彥超凶狡多計謀恐璋不能集事選爾代之已敕曹英向訓不令以軍禮見汝及至軍中英訓皆尊禮之當時有為宿將築連城以圍彥超晝夜出兵元福屢擊敗之遂閉壁不敢出十餘日元福營柵皆就又穴地及築土山百道攻其城會周祖親征元福以所部先入羊馬城諸軍鼓譟角進拔之以功授建雄軍節度世宗高平之戰劉崇敗走太原遂縱兵圍其城以元福為同州節度充太原四面壕砦都部署時攻具悉備城中危急以糧運不繼

詔令班師元福上言曰進軍甚易退軍甚難世宗曰
一以委卿遂部分卒伍為方陣而南元福以麾下為
後殿崇果出兵來追元福擊走之師還加檢校太尉
移鎮陝州又歷定廬曹三鎮宋初加檢校太師九月
卒年七十七贈侍中元福雖老筋骨不衰人或言其
氣貌益壯當復領兵必大喜曲致禮待或加以贈遺
時稱驍將

趙晁真定人初事杜重威為列校重威誅屬周祖鎮
鄆中晁因委質麾下周祖開國擢為作坊副使慕容
彥超據兗州叛以晁為行營步軍都監兗州平轉作

坊使晁自以逮事霸府復有軍功而遷拜不滿所望居常怏怏時樞密使王峻秉政晁疑其軋已一日使酒詣其第駁峻峻不之責世宗嗣位改控鶴左廂都指揮使領賀州刺史從征劉崇轉虎捷右廂都指揮使領本州團練使兼行營步軍都指揮使軍至河內世宗意在速戰令晁倍道兼行晁私語通事舍人鄭好謙曰賊勢方盛未易敵也宜持重以挫其銳好謙以所言入白世宗怒曰汝安得此言必他人所教言其人則舍爾不言當死好謙懼遂以實對世宗即命并晁械於州獄軍迴始赦之及征淮南改虎捷左廂

領閩州防禦使充前軍行營步軍都指揮使又為緣
江步軍都指揮使時李重進敗吳人于正陽以降卒
三千人付晁晁一夕盡殺之世宗不之罪壽春平拜
檢校太保河陽三城節度孟懷等州觀察措置等使
恭帝即位加檢校太傅宋初加檢校太尉未幾以疾
歸京師卒年五十二太祖甚悼之贈太子太師再贈
侍中晁身長七尺儀貌雄偉好聚斂處方鎮以賄聞
以周初與宣祖分掌禁軍有宗盟之分故太祖常優
禮之再加贈典焉子延溥

延溥周顯德中以父任補左班殿直宋初為鐵騎指

揮使開寶初太祖親征晉陽太宗守京邑延溥以所部為帳下牙軍轉殿前散員指揮使九年改鐵騎都虞候太宗即位遷散指揮都虞候領恩州刺史太平興國二年轉內殿直都虞候三年改馬步軍都虞候從平太原略地燕薊六軍扈從有後期至者帝怒欲寘于法廷溥遂進曰陛下巡行邊陲以防禦外侮今契丹未殄而誅譴將士若舉後圖誰為陛下戮力乎帝嘉納之師還遷内外馬步軍都軍頭領本州防禦使五年殿前白進超卒即日以延溥為日騎天武左右廂都指揮使兼權殿前都虞候事坐遣親吏市竹

木所過關渡矯稱制免築責授登州團練使令赴任
是冬帝北巡至大名復以延溥為本州防禦使即命
為幽州東路行營壕砦都監詔修緣邊城壘逾年加
涼州觀察使仍判登州又為鎮州兵馬都部署俄判
霸州雍熙二年改蔚州觀察使判冀州會命曹彬等
北征又與內衣庫使張紹勣引進副使董愿為幽州
西北道行營都監師還命知貝州改滑州部署四年
再知貝州以疾求代代未至卒年五十贈天德軍節
度子承彬至內殿崇班承彬子咸一為虞部員外郎
知宗正丞事咸熙天聖八年進士及第

論曰侯益在晉漢時數為反覆觀其受命契丹私交
偽蜀赤岡之戰復夜謁周祖宗屬長幼遭景崇鯨鯢
殆無噍類推其心迹豈懷貳之罰歟辭懷讓趙晁為
將皆忍於殺降晁子延溥能救後至之誅雖父子之
親仁暴相戾有若是者餘皆逢時奮武致身榮顯扈
彥珂請擊河中卒用其策愚者之一慮云

列傳卷第十三

列傳卷第十四

宋史二百五十五

開府儀同三司上贊鑾輦國筆事前書表參相監修國史類經選事都總裁曉脫等奉

勅修

郭崇

楊廷璋

宋偓

向拱

王彥超

張永德

王全斌

曾孫凱

康延澤

王繼清
高彥暉附

郭崇應州金城人重厚寡言有方略初名崇威避周祖名止稱崇父祖俱代北酋長崇弱冠以勇力應募為卒後唐清泰中為應州騎軍都校晉祖割雲應地入為契丹崇耻事之奮身南歸歷鄆河中潞三鎮騎

軍都校開運中戍太原會漢祖起義以崇為前鋒入
汴改護聖左第六軍都校領郢州刺史改領富州從
周祖平河中以功遷果州防禦使領護聖右廂都指
揮使周祖鎮鄴以崇領行營騎軍兼天雄軍都巡檢
使乾祐三年冬崇從周祖平國難與李筠拒慕容彥
超於劉子陂走之以崇補侍衛馬軍都指揮使遣馮
道等迎湘陰公贊於徐州將立之會契丹南侵周祖
北征次于澶州為六軍推戴樞密使王峻在京師聞
變遣崇率七百騎東拒贊遇於睢陽崇陣于牙門外
賀懼登門樓呼崇曰汝等何遽至此崇曰澶州軍變

遣崇等來衛乘輿非有他也贊召崇升樓崇未敢登即遣道下與語崇乃登具言軍情有屬天命已定贊執崇手泣俛首久之俄而贊所領衛兵都校張令超以衆歸崇贊親將賈王等數怒目視道將害之贊曰汝輩勿草草此非關令公事崇即送贊就館舍廣順初領定武軍節度又為京城都巡檢使修城都部署兼知步軍公事未幾復升陳州為節鎮以潁州隸焉命崇為節度周祖親郊加同平章事出鎮澶州周祖不豫促還鎮所世宗立弁人侵潞州命崇與符彥卿出固鎮以禦之世宗親征又副彥卿為行營都部署

師還加兼侍中冬移真定尹成德軍節度四年世宗
征淮南契丹出騎萬乘餘掠邊崇率師攻下束鹿縣
斬數百級俘獲甚衆五年天清節崇來朝表求致政
不允賜襲衣金帶器幣鞍勒馬遣之世宗平關南至
靜安軍崇來朝恭帝嗣位加檢校太師宋初加兼中
書令崇追感周室恩遇時復泣下監軍陳思誨密奏
其狀因言常山近邊崇有異心宜謹備之太祖曰我
素知崇篤於恩義蓋有所激發爾遣人覘之還言崇
方對賓屬坐池潭小亭飲博城中晏然太祖笑曰果
如朕言未幾來朝時命李重進為平盧軍節度重進

叛改命崇為節制乾德三年卒年五十八太祖聞之震悼贈太師子守璘至洛苑副使妻即明德皇后之姊也子允恭以父任授殿直至崇儀副使知常州卒次女為仁宗皇后天聖三年詔贈崇尚書令兼中書令守璘大尉寧國軍節度允恭太傅安德軍節度六年又詔追封崇英國公加贈守璘永清軍節度兼中書令允恭忠武軍節度兼侍中允恭子中庸左侍禁閣門祗候副使中和娶潁川郡王德彝女為西染院副使

楊廷璋字溫玉真定人家世素微賤有姊寡居京師

周祖徵時欲聘之姊不從令媒氏傳言恐逼姊以告廷璋廷璋往見周祖歸謂姊曰此人姿貌異常不可拒姊乃從之周祖從漢祖鎮太原廷璋屢省其姊周祖愛其純謹姊卒留廷璋給事左右及出討三叛入平國難廷璋數獻奇計即位追冊廷璋姊為淑妃擢廷璋為右飛龍使廷璋固辭不拜願推恩其父洪裕即令召洪裕赴闕以老病辭就拜金紫光祿大夫真定少尹廷璋歷皇城使昭義兵馬都監澶州巡檢使世宗自澶淵還京言廷璋有幹材遷客省使俄為河陽巡檢知州事涇帥史懿稱疾不朝周祖命廷璋往

代之將行謂之曰懿不就命即圖之廷璋至屏左右
以詔書示懿諭以禍福懿即日載路俄聞周主崩廷
璋嘔血不食者數日世宗立拜左驍衛大將軍充宣
徽北院使征劉崇以為建雄軍節度在鎮數年頗有
惠愛前後率兵入太原境拔仁義高麗等砦獲刺史
軍校數十人俘其民數千戶獲兵器羊馬數萬計并
人棄沁州二百里退保新城廷璋遂置保安興同白
壁等十餘砦會隰州刺史孫議卒廷璋遣監軍李謙
溥領州事謙溥至并人來攻其城議者以為宜速救
之廷璋曰隰州城壁堅完并人奄至未能為攻城具

當出奇以破之乃募敢死士百餘人許以重賞由間道遣人約謙溥為內應既至即銜枚夜擊城中鼓譟以出并人大潰追北數十里斬首千餘級獲器甲萬計奏至世宗喜曰吾舅真能禦寇詔褒之世宗自河東還加檢校太保顯德六年夏率所部入河東界下堡砦十三降巡檢使蘄漢晁等三人恭帝即位加檢校太傅宋初加檢校太尉吏民詣闕請立碑頌功德太祖命盧多遜撰文賜之李筠叛潛遣親信使齋蠻書求援鄰境廷璋獲之械送京師因上攻取之策即下詔委以經略及車駕親征詔廷璋率所部入陰地

分賊勢賊平歸鎮是秋來朝改鎮邠州乾德四年移
鄜州開寶二年召為右千牛衛上將軍四年卒年六
十贈帛二百匹廷璋羨鬚長上短下好修容儀雖見
小吏未嘗懈惰善待士幕府多知名人在晉州日太
祖命荆罕儒為鉅轄罕儒以廷璋周朝近親疑有異
志每入府中從者皆持刀劍欲圖廷璋廷璋推誠待
之殊不設備罕儒亦不敢發終亦無患議者以廷璋
在涇州保全史懿陰德之報也洪裕少時嘗漁於貂
裘陂忽有馳騎至者以二石鴈授洪裕一翼掩左一
翼掩右曰吾比獄使者也言訖忽不見是年生淑妃

明年生廷璋家遂昌盛廷璋子七人皆不為求官惟表其孤甥安崇勲得西頭供奉官崇勲後唐樞密使重誨子也廷璋子坦塽皆進士及第坦至屯田員外郎鹽鐵副使判官塽為都官郎中

宋偓河南洛陽人謙恭下士祖璠唐天德軍節度兼中書令父廷浩尚後唐莊宗女義寧公主生偓廷浩歷石原房三州刺史晉初為汜水關使張從賓之叛力戰死之偓年十一以父死事補殿直遷供奉官晉祖嘗事莊宗每偓母入見詔令勿拜因從容謂之曰朕於主家誠無所斬但朝廷多事府庫空竭主所知

也今主居輦下薪米為憂當奉主居西洛以就豐泰
命偓分司就養敕有司供給至於醯醢率有加等漢
祖在晉陽遣其子承訓至洛奉書偓母與偓結昏即
永寧公主也累授北京皇城使漢乾祐初拜右金吾
衛大將軍駙馬都尉隱帝即位授昭武軍節度移鎮
滑州周祖舉兵向闕時偓在鎮開門迎謁周祖深德
之偓率所部兵從周祖至劉子陂隱帝衛兵悉走投
周祖周祖謂偓曰至尊危矣公近親可亟去擁衛無
令驚動偓策馬及御營軍已亂矣廣順初丁內艱服
除授左監門衛上將軍世宗征淮南令偓與左龍武

統軍趙贊右神武統軍張彥超前景州刺史劉建於
壽州四面巡檢師還以偓為右神武統軍充行營右
廂都排陣使又為廬州城下副部署吳入大發舟師
次東沛洲斷蘇杭之路世宗遣偓領戰艦數百艘襲
之又遣大將慕容延劍率步騎而進水陸合勢大破
之世宗嘗次于野有虎逼乘輿偓引弓射之一發而
斃及江北諸州悉平晝江為界世宗駐迎鑾命偓率
舟師三千泝江而上巡警諸郡師還復授滑州節制
校太師遣領舟師巡撫江徼舒州團練使司超副之
又移鎮鄧州恭帝即位加開府儀同三司宋初加檢

李重進謀以揚州叛偓察其狀飛章以聞太祖令偓屯海陵以觀重進去就遂從征揚州為行營排陣使及平以功改保信軍節度來朝徙鎮華州會鑿池都城南命偓率舟師數千以習水戰車駕數臨觀焉五年改忠武軍節度開寶初太祖納偓長女為后偓本名延渥以父名下字從水開寶初上言改為偓三年徙邠州太平興國初加同平章事二年移定國軍節度四年從平太原又從征幽州詔偓與尚食使侯昭名召偓詣行在詔知滄州六年封邢國公俄遷同州

九年又為右衛上將軍雍熙中曹彬等北伐班師命
偓知霸州歸闕端拱二年卒年六十四廢朝贈侍中
謚莊惠中使護葬偓莊宗之外孫漢祖之壻女即孝
章皇后近代貴盛鮮有其比子元靖至供備庫使元
度至供備庫副使元載元亨並至左侍禁閭門祇候
初孝章寢疾語晉國長公主曰我瞑目無他憂惟慮
族屬不敦睦貽笑於人景德中偓幼子元翰果詣京
府求析家財真宗聞之詔釋勿問仍諭其族屬務遵
先後遺戒焉元度子惟簡為殿直惟易為奉職
向拱字星民懷州河內人始名訓避周恭帝諱改焉

少倜儻負氣弱冠聞漢祖在晉陽招致天下士將徃
依之中途遇盜見拱狀貌雄偉意為富家子隨之將
劫其財拱覺行至石會關殺所乘驥市酒會里中豪
傑告其故咸出丁壯護拱至太原以策干漢祖漢祖
不納客於周祖門下及周祖領節鎮署拱知客押牙
周祖即位授官苑使廣順中遷皇城使出監昭義屯
軍并人領馬步十五都來侵拱與巡檢陳思讓逆戰
於虎亭南殺三百餘人擒百人獲其帥王璠曹海金
又敗其軍於壺關師還會征慕容彥超命為都監賜
以六銖袍帶鞍勒馬器仗即日遣行賊平命為陝州

巡檢未幾改客省使知陝州會延州高允權卒其子
紹基欲求繼襲即自領使務朝廷益禁兵戍守命拱
權知州事俄遷內客省使嘗請禁州民賣軍裝兵器
於西人從之所屬部落有侵盜漢戶者拱招其酋帥
犒之令誓不敢侵犯召拜左神武大將軍宣徽南院
使劉崇入寇遣馬軍樊愛能步軍何徽赴澤州令拱
監護之世宗親征拱以精騎居陣中高平之捷以功
兼義成軍節度河東行營前軍都監師還出鎮陳州
先是晉末秦州節度何建以秦成階三州入蜀蜀人
又取鳳州至是宰相王溥薦拱討之乃召拱與鳳翔

王景並率兵出大散關連下城砦復命拱為西南面
行營都監蜀人聞鳳州急發卒五千餘出鳳州北堂
倉鎮路行至黃花谷將絕周師糧道拱與王景偵知
之命排陣使張建雄領兵二千直抵黃花谷又遣別
將領勁卒千人出敵後截其歸路敵果為建雄所敗
奔堂倉又為勁卒所逼合勢掩擊擒其監軍王巒孫
韜等千五百餘由是劙門之下州邑營砦望風宵遁
秦鳳階成平召歸宴於金祥殿賜襲衣金帶銀器繒
帛鞍勒馬顯德二年世宗親征淮南以拱權東京留
守兼判開封府事時揚州初平南唐令境上出師謀

收復韓令坤有棄城之意即驛召拱赴行在拜淮南節度依前宣徽使兼緣江招討使以令坤為副時周師久駐淮陽都將趙晃白廷遇等驕恣橫暴不相稟從惟務貪濫至有劫人妻女者及拱至戮其不奉法者數輩軍中肅然六月追叙秦鳳功加檢校太尉時周師圍壽春經年未下江淮草寇充斥吳援兵柵於紫金山與城中烽火相應而舒蘄和泰復為吳人所據拱上言欲且徙揚州之師併力攻壽春俟其城下然後改圖進取世宗從之拱乃封庫付揚州主者復遣本府牙將分部按巡城中秋毫不犯軍民感悅及

師行吳人有負糧糧以送者至壽春與李重進合勢
以攻其城改淮南道招討都監敗淮南軍二千于黃
耆砦世宗再幸壽州召拱宴賜甚厚以為武寧軍節
度命領其屬駐鎮淮軍及克壽州以功加同平章事
領武寧軍節度四年徙歸德軍節度淮南平改山南
東道節度俄充西南面水陸發運招討使恭帝即位
加檢校太師河南尹西京留守宋初加兼侍中太祖
征李筠拱迎謁至汜水言於上曰筠逆節久著兵力
日盛陛下宜急濟大河踰太行乘其未集而誅之緩
則勢張難為力矣帝從其言卷甲倍道趨之筠果率

兵南向聞車駕至惶駁走澤州城守遂見擒乾德初從郊祀畢封譙國公拱尹河南十餘年專治園林第舍好聲妓縱酒為樂府政廢弛群盜晝劫太祖聞之怒移鎮安州命左武衛上將軍焦繼勲代之謂繼勲曰洛久不治選卿代之無復效拱為也太平興國初進封秦國公來朝授左衛上將軍八年代王彥超判左金吾衛仗事表獻西京長夏門北園詔以銀五千兩償之雍熙三年卒年七十五贈中書令咸平初真宗聞拱之後有寒餒流離者錄其孫懌為國子助教拱子德明至洛死使昱大中祥符八年進士出身德

明子悅為虞部郎中

王彥超大名臨清人性溫和恭謹能禮下士少事後唐魏王繼岌從繼岌討蜀還至渭南會明宗即位繼岌遇害左右遁去彥超乃依鳳翔重雲山僧舍暉道人為徒暉善觀人謂彥超曰子富貴人也安能久居此給資帛遣之時晉祖帥陝乃召至帳下委以心腹及移鎮太原將引兵南下遣從事桑維翰求援契丹以彥超從行天福初累遷奉德軍校再轉殿前散指揮都虞候領蒙州刺史漢初領岳州防禦使兼護聖左廂都校出為復州防禦使周祖平內難後北征契丹

丹以彥超為行營馬步左廂都排陣使從周祖入汴時自彭門迎湘陰公入續位會軍變周祖革命即命彥超權知徐州節度未行湘陰公舊校輦廷羨據州叛真拜彥超武寧軍節度命討之彥超督戰艦破其水砦乘勝拔之又與樞密使王峻拒劉崇於晉州彥超以騎兵進崇遁去授建雄軍節度復以所部追賊至霍邑賊步騎墮崖谷死者甚衆彥超歸鎮所俄改河陽三城節度移鎮河中顯德初加同平章事劉崇南寇命彥超領兵取晉州路東向邀擊從戰高平彥超自陰地關與符彥卿會兵圍汾州諸將請急攻彥

趙曰城已危矣旦暮將降我士卒精銳儻驅以先登必死傷者衆必待之翌日州將董希顏果降遂引兵趣石州彥超親鼓士乘城躬冒矢石數日下之擒其守將安彥進獻行在師還改忠武軍節度加兼侍中詔率所部浚胡蘆河城李晏口工未畢遼人萬餘騎來侵彥超擊敗之殺傷甚衆宰相李穀征淮南以彥超為前軍行營副部署敗淮南軍二千于壽州城下吳兵水陸來援穀退保正陽吳人躡其後會李重進兵至合勢急擊大敗吳人三萬餘衆追北二十餘里還改京兆尹永興軍節度六年夏移鎮鳳翔恭帝嗣

位加檢校太師西面緣邊副都部署宋初加兼中書
令代還太祖與彥超有舊因幸作坊召從臣宴射酒
酣謂彥超曰卿昔在復州朕徃依卿何不納我彥超
降階頓首曰勺水豈能止神龍耶當日陛下不留滯
於小郡者蓋天使然爾帝大笑彥超翌日奉表待罪
帝遣中使慰諭令赴朝謁未幾復以為永興軍節度
又以其父光祿卿致仕重霸為太子少傅致仕乾德
二年復鎮鳳翔三年丁外艱起復開寶二年為右金
吾衛上將軍判街仗事太平興國六年封邠國公七
年彥超語人曰人臣七十致仕古之制也我年六十

九當自知止明年表求致仕加太子太師給金吾上
將軍祿彥超既得請盡斥去僕妾之冗食者居處服
用咸遵儉約雍熙三年卒年七十三贈尚書令開寶
初彥超自鳳翔來朝與武行德郭從義白重贊楊廷
璋俱侍曲宴太祖從容謂曰卿等皆國家舊臣久臨
劇鎮王事鞅掌非朕所以優賢之意彥超知旨即前
奏曰臣無勲勞久冒榮寵今已衰朽願乞骸骨歸丘
園臣之願也行德等竟自陳夙昔戰功及履歷艱苦
帝曰此異代事何足論翌日皆罷行德等節鎮時議
以此許彥超初彥超將致政每戒諸子曰吾累為統

帥殺人多矣身死得免為幸必無陰德以及後汝曹
勉為善事以自庇及卒諸子果無達者宣化門內有
大第園林甚盛不十餘年其家已鬻之矣孫克從咸
平元年進士及第亦止於州縣

張永德字抱一并州陽曲人家世饒財曾祖丕尚氣
節後唐武皇鎮太原急於用度多嚴選富家子掌帑
庫或調度不給即坐誅沒入貲產丕為之滿歲府財
有餘宗人政當次補其任率族屬泣拜請不濟其急
丕又為代掌一年鄉里服其義父頴事晉至安州防
禦使永德生四歲母馬氏被出育於祖母事繼母劉

以孝聞周祖初為侍衛吏與穎善另以女妻永德永
德迎其母妻詣宋州時寇賊充斥乃易弊衣毀容儀
居委巷中有賊過即邀乞焉給曰此悲田院耳賊即
舍去繇是免禍周祖為樞密使表永德授供奉官押
班乾祐中命賜潞帥常遇生辰禮幣遇周祖之外兄
弟也時周祖鎮鄆被讒族其家永德在潞州聞有密
詔授遇永德探知其意謂遇曰得非泣殺永德耶永
德即死無怨恐累君俠家耳遇愕然曰何謂也永德
曰姦邪蠹政郭公誓清君側願且以永德屬吏事成
足以為德不成死未晚遇以為然止令壯士嚴衛然

所以餽之甚厚親問之曰君視丈人事得成否永德
曰殆必成未幾周祖使至遇賀且謝曰老夫幾誤大
事初魏人柴翁以經義教里中有女後唐莊宗時備
披庭明宗入洛遣出宮柴翁夫妻往迎之至鴻溝遇
雨甚踰旬不能前女悉取裝具計直千萬分其半以
與父母令歸魏曰兒見溝旁郵舍隊長項黯黑為雀
形者極貴人也願事之間之乃周祖也父母大愧然
終不能奪他日語周祖曰君貴不可言妾有縉錢五
百萬資君時不可失周祖因其資得為軍司柴翁好
獨寢人傳其能司冥間事一日晨起大笑不已妻問

之不對翁好飲其妻逼令飲極醉因漏言曰花項漢作天子矣其妻頗露之遇亦微有聞未深言至是永德故以此諷遇遇送永德歸周祖周祖登位封永德妻為晉國公主授永德左衛將軍內殿直小底四班都知加駙馬都尉領和州刺史逾年擢為殿前都虞候領恩州團練使俄遷殿前都指揮使泗州防禦使時年二十四顯德元年并州劉崇引契丹來侵世宗親征戰于高平大將樊愛能何徽方戰退衄時太祖與永德各領牙兵二千永德部下善左射太祖與永德厲兵分進大捷降崇軍七千餘衆及駐上黨世宗

晝卧帳中召永德語曰前日高平之戰主將殊不用命樊愛能而下吾將案之以法永德曰陛下欲固守封疆則已必欲開拓疆宇威加四海宜痛懲其失世宗擲枕於地大呼稱善翌日誅二將以徇軍威大振進攻太原師薄城下永德與符彥卿史彥超北控忻口以斷契丹援路太原城四十里周師去城三百步圍之三匝自四月至六月攻之不克契丹援兵果至彥超戰沒繼敗其衆二千餘衆遁去以永德領武信軍節度師還徙義成軍節度時永德父穎為隸人曹澄等所害因奔南唐會議南征永德請行自効許之

師至壽春劉仁瞻堅壁不下永德出汲兵誘之傍伏
精騎每戰陽不利北退三十里伏兵突起夾攻大敗
之仁瞻僅以身免三年世宗親征至壽州城下仁瞻
執澄等三人檻送行在意求緩師詔賜永德俾其甘
心太祖與永德領前軍至紫金山吳入列十八砦戰
備嚴整敵壘西偏有高隴下瞰其營中永德選勁弓
強弩伏隴旁太祖麾兵直攻第一砦戰陽不勝淮人
果空砦出閩永德亟登隴發伏馳入據之敵衆散走
翌日又攻第二砦鼓譟而進始攻北門淮人開南門
而遁時韓令坤在揚州復為吳人所逼欲退師世宗

怒遣永德率師援之又敗泗州軍千餘于曲溪堰俄
屯下蔡時吳人以周師在壽春攻圍日急又恃水戰
乃大發樓船蔽江而下泊于濠泗周師頗不利吳將
林仁肇帥衆千餘水陸齊進又以船數艘載薪乘風
縱火將焚周浮梁周人憂之俄而風反吳人稍却永
德進兵敗之又夜使習水者沒其船下縻以鐵鎖引
輕舠急擊吳人既不得進溺者甚衆奪其巨艦數十
艘永德解金帶賞習水者乃距浮梁十餘步以鐵索
千餘尺橫截長淮又維巨木自是備禦益堅矣俄又
敗千餘衆於淮北岸獲戰船數十艘吳人多溺死詔

褒美之冬擢為殿前都點檢四年從克壽州還制授
檢校太尉領鎮寧軍節度五年夏契丹擾邊命永德
率步騎二萬拒之從世宗北伐還駐澶淵解兵柄加
檢校太尉同中書門下平章事恭帝嗣位移忠武軍
節度太祖即位加兼侍中永德入朝授武勝軍節度
入觀召對後苑道舊故飲以巨觥每呼駙馬不名時
并汾未下太祖密訪其策永德曰太原兵少而悍加
以契丹為援未易取也臣以每歲多設游兵擾其農
事仍發間使以謀契丹絕其援然後可下也帝然之
俄歸本鎮會出師討金陵永德以已資造戰船數十

艘運糧萬斛自順陽沿漢水而下富民高進者豪橫
莫能禁永德乃發其姦寘于法進潛詣闕誣永德緣
隙固置十餘砦圖爲不軌太祖命樞密都承旨曹翰
領騎兵察之詰其砦所進曰張侍中誅我宗黨殆盡
希中以法報私憤爾翰以進授永德永德遽解縛就
市笞而釋之時稱其長者太平興國二年來朝拜左
衛上將軍五年坐市秦隴竹木所過矯制免關市筭
降為本衛大將軍數月復舊秩六年進封鄧國公雍
熙中連知滄雄定三州端拱元年拜安化軍節度召
還為河北兩路排陣使屯定州嘗與契丹戰斬獲甚

衆二年丁內艱起復淳化初又代田重進知鎮州二
年改泰寧軍節度兼侍中出判并州兼并代都部署
永德明天文術嘗與僚佐會食有報遼兵寇州境者
利乘金而來反值歲星對逆兵家大忌必敗未幾折
御鄉捷報至衆始歎伏自五代用兵多姑息藩鎮頗
恣部下販鬻宋初功臣猶習舊事太宗初即位詔群
臣乘傳出入不得賚貨邀利及令人諸處圖回與民
爭利永德在太原嘗令親吏販茶規利闖出徼外市
羊為轉運使王嗣宗所發罷為左衛上將軍真宗即

位進封衛國公未幾判左金吾街仗事咸平初屢表
請老授太子太師分司西京仍以其孫大理寺丞文
蔚輦務洛下以便就養二年冬契丹入遼帝將北巡
以永德宿特召入對便殿賜坐訪以邊要以老不可
從行留為東京內外都巡檢使三年制授檢校太師
彰德軍節度知天雄軍俄以衰耄命還本鎮是秋卒
年七十三遣內園使馮守規護柩還京師贈中書令
諸孫遷秩者五人永德出母後適安邑劉祚及永德
鎮南陽祚已卒迎母歸州解起二堂與繼母劉並居
劉卒馬預中參時年八十一太宗勞之賜冠帔封莒

國大夫同母弟劉再思署子城使於市西里起大第聚劉族初永德寓睢陽有書生隣居卧疾永德療之獲愈生一日就永德求永五兩既得即置鼎中煮之成中金自是日與永德游一日告適淮上語永德曰後當相遇于彼永德曰吳境不通子何可去生曰吾自有術永德送行數舍懇求藥法生曰君當大貴吾不吝此慮煩君福言訖而去及永德屯下蔡牙帳前後隊部曲八百人皆金銀刀槊繡旗幟永德善騎射左右分掛十的握十矢疾馳互發發必中淮民環觀有一僧睥睨永德遽召之乃睢陽書生也夜宿帳

中復求永法僧曰始語君貴今不謬矣終能謹節當保五十年富貴安用此為然能降志禮賢當別有授公藥法者永德由此益罄家資延致方士故太祖以方外待之初睢陽書生嘗言太祖受命之兆以故永德潛意拱嚮太祖將聘孝明皇后也永德出縉錢金帛數千以助之故盡太祖朝而恩渥不替孫文蔚虞部員外郎文炳殿中丞

王全斌并州太原人其父事莊宗為岢嵐軍使私畜勇士百餘人莊宗疑其有異志召之懼不敢行全斌時年十二謂其父曰此蓋疑大人有他圖願以全斌

為質必得釋父從其計果獲全因以隸帳下及莊宗入洛累歷內職同光末國有內難兵入宮城近臣宿將皆棄甲遁去惟全斌與符彥卿等十數人居中拒戰莊宗中流矢扶掖至絳霄殿全斌慟哭而去明宗即位補禁軍列校晉初從侯益破張從賓於汜水以功遷護聖指揮使周廣順初改護聖為龍捷以全斌為右廂都指揮使及討慕容彥超于兗州為行營馬步都校顯德中從向訓平秦鳳遂領恩州團練使俄遷領泗州防禦使從世宗平淮南復瓦橋關改相州留後宋初李筠以潞州叛全斌與慕容延釗由東路

會大軍進討以功拜安國軍節度詔令完葺西山堡
砦不踰時而就建隆四年與洺州防禦使郭進等率
兵入太原境俘數千人以歸進克樂平乾德二年冬
又為忠武軍節度即日下詔伐蜀命全斌為西川行
營前軍都部署率禁軍步騎二萬諸州兵萬人由鳳
州路進討召示川陝地圖授以方略十二月率兵拔
乾渠渡萬仞嶺子二砦遂下興州蜀刺史藍思綰退
保西縣敗蜀軍七千人獲軍糧四十餘萬斛進拔石
圖魚關白水二十餘砦先鋒史延德進軍三泉敗蜀
軍數萬擒招討使韓保正副使李進獲糧三十餘萬

斛既而崔彥進康延澤等逐蜀軍過三泉遂至嘉陵殺虜甚衆蜀人斷閣道軍不能進全斌議取羅川路以入延澤潛謂彥進曰羅川路險軍難並進不如分兵治閣道與大軍會於深渡彥進以白全斌全斌然之命彥進延澤督治閣道數日成遂進擊金山砦破小漫天砦全斌由羅川趣深渡與彥進會蜀人依江列陣以待彥進遣張萬友等奪其橋會暮夜蜀人退保大漫天砦詰朝彥進延澤萬友分三道擊之蜀人悉其精銳來逆戰又大破之乘勝拔其砦蜀將王審諲監軍趙崇渥遁去復與三泉監軍劉延祚大將

王昭遠趙彥韜引兵來戰三戰三敗追至利州北昭遠遁去渡桔柏江焚梁退守劍門遂克利州得軍糧八十萬斛自利州趨劍門次益光全斌會諸將議曰劍門天險古稱一夫荷戈萬夫莫前諸君宜各陳進取之策侍衛軍頭向韜曰降卒半進言益光江東越大山數重有狹徑名來蘇蜀人於江西置砦對岸有渡自此出劍關南二十里至清強店與大路合可於此進兵即劍門不足恃也全斌等即欲卷甲赴之康延澤曰來蘇細徑不湏主帥親往且蜀人屢敗併兵退守劍門莫若諸帥協力進攻命一偏將趨來蘇若

達清強北擊劍闢與大軍夾攻破之必矣全斌納其策命史延德分兵趨來蘇造浮梁於江上蜀人見梁成棄砦而遁昭遠聞延德兵趨來蘇至清強即引兵退陣於漢源坡留其偏將守劍門全斌等擊破之昭遠崇韜皆遁走遣輕騎進獲傳送闕下遂克劍州殺蜀軍萬餘人四年正月十三日師次魏城孟昶遣使奉表來降全斌等入成都旬餘劉延讓等始自峽路至昶饋遺延讓等及犒師並同全斌之至及詔書頒賞諸軍亦無差降由是兩路兵相嫉蜀人亦構主帥遂不協全斌等先受詔每制置必須諸將僉議至是

雖小事不能即決俄詔發蜀兵赴闕人給錢十千未
行者加兩月廩食全斌等不即奉命由是蜀軍憤怨
人人思亂兩路隨軍使臣常數十百人全斌彥進及
王仁瞻等各保庇之不令部送蜀兵但分遣諸州牙
校蜀軍至綿州果叛劫屬邑衆至十餘萬自號興國
軍有蜀交州刺史全師雄者嘗為將有威惠士卒畏
服適以其族赴闕下綿州遇亂師雄恐為所脅乃匿
其家於江曲民舍後數日為亂兵所獲推為主帥全
斌遣都監米光緒往招撫之光緒盡滅師雄之族納
其愛女及橐裝師雄聞之遂無歸志率衆急攻綿州

為橫海指揮使劉福龍捷指揮使田紹斌所敗遂攻
彭州逐刺史王繼濤殺都監李德榮據其城成都十
縣皆起兵應師雄師雄自號興蜀大王開幕府置僚
屬署節帥二十餘人令分據灌口導江邛新繁青城
等縣彥進與張萬友高彥暉田欽祚同討之為師雄
所敗彥暉戰死欽祚僅免賊衆益盛全斌又遣張延
翰張煦往擊之不利退入成都師雄分兵綿漢間斷
閭道緣江置砦聲言欲攻成都自是邛蜀眉雅東川
果遂渝合資簡昌普嘉戎榮陵十七州並隨師雄為
亂郵傳不通者月餘全斌等甚懼時城中蜀兵尚餘

二萬全斌慮其應賊與諸將謀誘致夾城中盡殺之
未幾劉延讓曹彬破師雄之衆於新繁俘萬餘人師
雄退保鄆縣全斌仁贍又攻破之師雄走保灌口砦
賊勢既衄餘黨散保州縣有陵州指揮使元裕者師
雄署為刺史衆萬餘仁贍生擒之磔于成都市俄虎
捷指揮使呂翰為主將所不禮因殺知嘉州客省使
武懷節戰權都監劉漢卿與師雄黨劉澤合衆至五
萬逐普州刺史劉楚信殺通判劉沂及虎捷都校馮
紹又果州指揮使宋德威殺知州八作使王永昌及
通判劉渙都監鄭光弼逐州牙校王可瑤率州民為

亂位瞻等討呂翰於嘉州翰敗走入雅州師雄病死
於金堂推謝行本為主羅七君為佐國令公與賊將
宋德威唐陶鼇據銅山旋為康延澤所破仁瞻又敗
呂翰於雅州翰走黎州為下所殺棄屍水中後丁德
裕等分兵招輯賊衆始息全斌之入蜀也適屬冬暮
京城大雪太祖設氈帷於講武殿衣紫貂裘帽以視
事忽謂左右曰我被服若此體尚覺寒念西征將衝
犯霜雪何以堪處即解裘帽遺中黃門馳賜全斌仍
諭諸將以不徧及也全斌拜賜感泣初成都平命參
知政事呂餘慶知府事全斌但典軍旅全斌嘗語所

親曰我聞古之將帥多不能保全功名今西蜀既平欲稱疾東歸庶免悔吝或曰今寇盜尚多非有詔旨不可輕去全斌猶豫未決會有訴全斌及彥進破蜀日奪民家子女玉帛不法等事與諸將同時召還太祖以全斌等初立功雖犯法不欲辱以獄吏但令中書問狀全斌等具伏詔曰王全斌王仁瞻崔彥進等被堅執銳出征全蜀彼畏威而納款尋馳詔以申恩用示哀矜務敦綏撫應孟昶宗族官吏將卒士民悉令安存無或驚擾而乃違戾約束侵侮憲章專殺降兵擅開公帑豪奪婦女廣納貨財歛萬民之怨嗟致

群盜之充斥以至再勞調發方獲平寧洎命旋歸尚
欲含忍而銜冤之訴日擁國門稱其隱沒金銀犀玉
錢帛十六萬七百餘貫又擅開豐德庫致失錢二十一
八萬一千餘貫遂令中書門下召與訟者質證其事
而全斌等皆引伏其令御史臺於朝堂集文武百官
議其罪於是百官定議全斌等罪當大辟請準律處
分乃下詔曰有征無戰雖舉於王師禁暴戢兵當崇
於武德蠢茲庸蜀自敗姦謀爰伐罪以宣威俄望風
而歸命遽令按堵勿犯秋毫庶德澤之涵濡俾生聚
之寧息而忠武軍節度王全斌武信軍節度崔彥進

董茲銳旅奉我成謀既居克定之全功宜體輯柔之
深意比謂不日清謐即時凱旋懋賞策勲抑有彝典
而罔思寅畏速此悔尤貪殘無厭殺戮非罪稽于偃
革職爾玩兵尚念前勞特從寬貸止停旄鉞猶委藩
宣我非無恩爾當自省全斌可責授崇義軍節度觀察
留後彥進可責授昭化軍節度觀察留後特建隨州
為崇義軍金州為昭化軍以處之仁贍責授右衛大將軍開寶末車駕幸洛陽郊祀召全斌侍祠以為
武寧軍節度謂之曰朕以江左未平慮征南諸將不
遵紀律故抑卿數年為朕立法今已克金陵還卿節

錢仍以銀器萬兩帛萬匹錢千萬賜之全斌至鎮數月卒年六十九贈中書令天禧二年錄其孫永昌為三班奉職全斌輕財重士不求聲譽寬厚容衆軍旅樂為之用黜居山郡十餘年怡然自得識者稱之子審鈞崇儀使富州刺史廣州兵馬鈺轄審銳供奉官閣門祗候曾孫凱

凱字勝之祖審鈞嘗為永興軍駐泊都監以擊賊死遂家京兆饒於財凱散施結客日馳獵南山下以踐蹂民田捕至府時寇準守長安見其狀貌奇之為言全斌取蜀有勞而審鈞以忠義死當錄其孤遂以為

三班奉職監鳳翔盩厔稅歷左右班殿直監益州市
買院慶州合水鎮兵馬監押監在京草場先是守卒
掃遺稈自入凱禁絕而衆欲害之事覺他監官皆坐
故縱凱獨得免自右侍禁雄州兵馬監押擢閭門祗
候定邢趙都巡檢使元昊反徙麟州都監嘗出雙烽
橋染枝谷遇夏人破之又破龐青黃羅部再戰于伺
候烽前後斬首三百餘級獲區落馬牛橐駝器械以
數千計夏人圍麟州乘城拒鬪晝夜三十日始解
去特遷西頭供奉官代遷邊寇猶鈔掠以為內殿崇
班麟州路緣邊都巡檢使與同巡檢張岊護糧道于青

眉浪寇猝大至與岳相失乃分兵出其後夾擊之復
與岳合斬首百餘級又入兔毛川賊衆三萬凱以兵
六千陷圍流矢中面鬪不解又斬首百餘級賊自蹠
蹠死者以千數遷南作坊副使後為并代州鈴轄管
勾麟府軍馬事夏人二萬寇青塞堡凱出鞋邪谷轉
戰四十里至杜肱川大敗之復得所掠馬牛以還經
略使明鎬言凱在河外九年有功遂領資州刺史久
之召還未及見會甘陵盜起即命領兵赴城下賊平
拜澤州刺史知邠州未幾為神龍衛四廂都指揮使
澤州團練使歷環慶并代定州路副都總管捧日天

武四廂綿州防禦使累遷侍衛親軍步軍副都指揮使涇州觀察使又徙秦鳳路辭日帝諭以唃氏木征交易阻絕頗有入寇之萌宜安靜以處之凱至與主帥以恩信撫接遂復常貢召拜武勝軍節度觀察留後侍衛親軍馬軍副都指揮使卒年六十六贈彰武軍節度使謚莊恪凱治軍有紀律善撫循士卒平居與均飲食至臨陣援枹鼓毅然不少假故士卒畏信戰無不力前後與敵遇未嘗挫衄兔毛川之戰內侍宋永誠哭于軍中凱効罷之尤篤好於故舊子緘緘子詵字晉卿能詩善畫尚蜀國長公主官至留後

康延澤父福晉護國軍節度兼侍中延澤天福中以
蔭補供奉官周廣順二年永興李洪信入覲遣延澤
往巡檢遷內染院副使宋初從慕容延鈞李處耘平
湖湘時荊南高保融卒其子繼冲嗣領軍事命延澤
齋書幣先往撫之且察其情僞及還盡得其機事因
前導大軍入境遂下荆峽以勞授正使乾德中征蜀
為鳳州路馬軍都監破白水閭子二砦進擊西縣三
泉獲韓保正由來蘇路會大軍克劒門及孟昶降延
澤以百騎先入成都安撫軍民盡封府庫而還就命
為成都府都監會全師雄復亂徙為晉州刺史時有

降兵二萬七千諸將懼為內應欲盡殺之延澤請簡老幼疾病七千人釋之餘以兵衛還浮江而下賊若來劫奪即殺之未晚諸將不能用俄出兵敗賊黨劉澤三萬人復有王可瑤率數郡賊兵來戰延澤擊走之追北至合州又破可瑤餘黨謝行本等擒羅七君事平優詔嘉獎就命為東川七州招安巡檢使全斌等得罪延澤亦坐貶唐州教練使開寶中起為供奉官遷左藏庫副使坐與諸姪爭家財失官居西洛卒兄延沼幼隸後唐明宗帳下仕晉祖為尚食使改散指揮使都虞候與聖軍都指揮使出為隨澤二州刺

史周祖北征延沼與白文遇李彥崇曹奉金彝從廣
順中為侍衛馬步軍都軍頭領信州刺史從世宗征
劉崇率兵攻遼州轉龍捷右廂都校領岳州防禦使
真拜蔡齊鄭楚四州防禦使晉潞二州兵馬鈜轄宋
初李重進叛以延沼為前軍馬軍都指揮使建隆四
年改懷州防禦使乾德六年命李繼勳等征河東以
延沼為先鋒都監太祖親征太原以延沼宿將熟練
邊事詔領兵屯潞州會以疾歸郡開寶二年卒年五

十八

王繼濤河朔人少給事漢祖左右乾祐初補供奉官

歷諸司副使仕周為右武衛大將軍淮南平為天長
軍使顯德五年遷和州刺史宋初為左驍騎大將軍
再遷左神武大將軍乾德二年命護徒治安陵隧道
大軍伐蜀為鳳州路壕砦使興元降王全斌命繼濤
權府事孟昶降全斌又遣繼濤與供奉官王守訥部
送昶歸闕守訥白全斌言繼濤問昶求官妓金帛全
斌遂留繼濤止令守訥送昶俄詔以繼濤為彭州刺
史綿州軍亂劫全師雄為帥率衆攻彭州繼濤與都
監李德榮拒之德榮戰死繼濤身被八槍單騎走至
成都素與通事舍人田欽祚有隙會欽祚入朝乃誣

奏繼濤以他事太祖驛召繼濤將面質之道病卒詔
曰故彭州刺史王繼濤先登擊賊身被重創優典未
加齋志而歿故階州刺史高彥暉帥師討賊奮不顧
命垂老之年殞身鋒鏑永言痛悼不忘于懷宜各賜
其家粟帛

高彥暉薊州漁陽人仕契丹為瀛州守將世宗北征
以城來降遷耀階二州刺史王師伐蜀為歸州路先
鋒都指揮使全師雄之亂崔彥進遣彥暉與田欽祚
共討之至導江與賊遇賊據隘路設伏竹箐中官軍
至遇伏發遂不利彥暉謂欽祚曰賊勢張大日將暮

請收兵詰朝與戰欽祚欲遁虜賊曳其後乃給之曰公食厚祿遇賊畏縮何也彥暉復麾兵進欽祚潛遁去彥暉獨與部下十餘騎力戰皆死之時年七十餘彥暉老將練習邊事上聞其歿甚痛惜故並命優恤之

論曰郭崇感激昔遇發於垂涕太祖察其忠厚亟焚思晦之奏雖魏文不彊於楊虎宋武無猜於徐廣何以加之廷璋開懷以待罕孺宋偓抗章以察重進向拱獻謀以平上黨乘時建功各奮所長有足尚者王彥超起自戎昭歷典藩服引年高蹈武夫之貞至於

自悔多殺垂戒後裔近乎仁人之用心張永德前朝
勲伐夙識太祖潛懷尊奉雖有橋公祖之知而非人
臣之不二心者矣乾德伐蜀之師未七旬而降欵至
諸將之功何可泯也王全斌贖貨殺降尋啓禍變太
祖罪之而從八議之貸斯得馭功臣之道延澤能相
地險豫謀屯備繼濤彥暉先登重傷殞沒無避咸可
稱焉

列傳卷第十四

一百三十七字

卷之十四

亂齋刊

列傳卷第十五

宋史二百五十六

開府儀同三司上柱國贊國軍事前書友丞相監修國史領經筵事都總裁長脫等奉

勅修

趙普 第安易

趙普字則平幽州薊人後唐幽帥趙德鈞連年用兵民力疲弊普父迴舉族徙常山又徙河南洛陽普沈厚寡言鎮陽豪族魏氏以女妻之周顯德初永興軍節度劉詞辟為從事詞卒遺表薦普於朝世宗用兵淮上太祖拔滁州宰相范質奏普為軍事判官宣祖卧疾滁州普朝夕奉藥餌宣祖由是待以宗分太祖

嘗與語奇之時獲盜百餘當棄市普疑有無辜者啓太祖訊鞠之獲全活者衆淮南平調補渭州軍事判官太祖領同州節度辟為推官移鎮宋州表為掌書記太祖北征至陳橋被酒卧帳中衆軍推戴普與太宗排闥入告太祖欠伸徐起而衆軍擐甲露刃誼擁麾下及受禪以佐命功授右諫議大夫充樞密直學士車駕征李筠命普與呂餘慶留京師普願扈從太祖笑曰若勝胄介乎從平上黨遷兵部侍郎樞密副使賜第一區建隆三年拜樞密使檢校太保乾德二年范質等三相同日罷以普為門下侍郎平章事集

賢殿大學士中書無宰相署敕普以為言上曰卿但進敕朕為卿署之可乎普曰此有司職爾非帝王事也令翰林學士講求故實竇儀曰今皇弟尹開封同平章事即宰相任也令署以賜普既拜相上視如左手事無大小悉咨決焉是日普兼監修國史命薛居正呂餘慶參知政事以副之不宣制班在宰相後不知印不預奏事不押班但奉行制書而已先是宰相兼敕皆用內制普相止用敕非舊典也太祖數微行過功臣家普每退朝不敢便衣冠一日大雪向夜普意帝不出久之聞叩門聲普亟出帝立風雪中普

惶懼迎拜帝曰已約晉王矣已而太宗至設重裯地坐堂中熾炭燒肉普妻行酒帝以嫂呼之因與普計下太原普曰太原當西北二面太原既下則我獨當之不如姑俟削平諸國則彈丸黑子之地將安逃乎帝笑曰吾意正如此特試卿爾五年春加右僕射昭文館大學士俄丁內艱詔起復視事遂勸帝遣使分詣諸道徵丁壯籍名送京師以備守衛諸州置通判使主錢穀由是兵甲精銳府庫充實開寶二年冬普嘗病車駕幸中書三年春又幸其第撫問之賜賚加等六年帝又幸其第時錢王倅遣使致書於普及海

物十瓶置於廡下會車駕至倉卒不及屏帝顧問何
物普以實對上曰海物必佳即命啓之皆瓜子金也
普惶恐頓首謝曰臣未發書實不知帝嘆曰受之無
妨彼謂國家事皆由汝書生爾普為政頗專廷臣多
忌之時官禁私販秦隴大木普嘗遣親吏詣市屋材
聯巨筏至京師治第吏因之竊貨大木冒稱普市貨
鬻都下權三司使趙玭廉得之以聞太祖大怒促令
追班將下制遂普賴王溥奏解之故事宰相樞密使
每候對長春殿同止廬中上聞普子承宗娶樞密使
李崇矩女即令分異之普又以隙地私易尚食蔬圃

以廣其居又營邸店規利盧多遜為翰林學士因召
對屢攻其短會雷有鄰擊登聞鼓訟堂後官胡贊李
可度受賄骯法及劉偉僞作攝牒得官王洞嘗納賂
可度趙孚授西川官稱疾不上皆普庇之太祖怒下
御史府按問悉抵罪以有鄰為秘書省正字普恩益
替始詔參知政事與普更知印押班奏事以分其權
未幾出為河陽三城節度檢校太傅同平章事太平
興國初入朝改太子少保遷太子太保頗為盧多遜
所毀奉朝請數年鬱鬱不得志會柴禹錫趙鎔等告
秦王廷美驕恣將有陰謀竊發帝召問普言願備樞

軸以察姦變退又上書自陳預聞太祖昭憲皇太后
顧託之事辭甚切至太宗感悟召見慰諭俄拜司徒
兼侍中封梁國公先是秦王廷羨班在宰相上至是
以普熟舊再登元輔表乞居其下從之及涪陵事敗
多遜南遷皆普之力也八年出為武勝軍節度檢校
太尉兼侍中帝作詩以餓之普奉而泣曰陛下賜臣
詩當刻石與臣朽骨同塋泉下帝為之動容翌日謂
宰相曰普有功國家朕昔與游今齒髮衰矣不容煩
以樞務擇善地屢之因詩什以導意普感激泣下朕
亦為之墮淚宋琪對曰昨日普至中書執御詩涕泣

謂臣曰此生餘年無階上答庶希來世得效犬馬力
臣昨聞普言今復聞宣諭君臣始終之分可謂兩全
雍熙三年春大軍出討幽薊久未班師普手疏諫曰
伏覩今春出師將以收復關外屢聞克捷深快輿情
然晦朔屢更荐臻炎夏飛輓日繁戰鬪未息老師費
財誠無益也伏念陛下自翦平太原懷徠閩浙混一
諸夏大振英聲十年之間遂臻廣濟遠人不服自古
聖王置之度外何足介意竊慮邪詔之輒蒙蔽睿聰
致興無名之師深蹈不測之地臣載披典籍頗識前
言竊見漢武時主父偃徐樂嚴安所上書及唐相姚

元崇獻明皇十事忠言至論可舉而行伏望萬機之
暇一賜觀覽其失未遠雖悔可追臣竊念大發驍雄
動搖百萬之衆所得者少所喪者多又聞戰者危事
難保其必勝兵者凶器深戒於不虞所繫甚大不可
不思臣又聞上古聖人心無固必事不凝滯理貴變
通前書有兵久生變之言深為可慮苟或更圖稽緩
轉失機宜旬朔之間時涉秋序邊庭早涼弓勁馬肥
我軍久困切慮此際或誤指蹤臣方冒寵以守藩曷
敢興言而沮衆蓋臣已日薄西山餘光無幾酬恩報
國正在斯時伏望速詔班師無容玩敵臣復有全策

願達聖聰望陛下精調御膳保養聖躬挈彼疲氓轉之富庶將見邊烽不警外戶不扃率土歸仁殊方異俗相率嚮化契丹獨將焉往陛下計不出此乃信邪詣之徒謂契丹主少事多所以用武以中陛下之意陛下樂禍求功以為萬全臣竊以為不可伏願陛下審其虛實究其妄謬正姦臣誤國之罪罷將士伐燕之師非特多難興王抑亦從諫則聖也古之人尚聞刃諫老臣未死豈敢面諫為安身之計而不言哉帝賜手詔曰朕昨者興師選將止令曹彬米信等領於雄霸裹糧坐甲以張軍聲俟一兩月間山後平安潘

羨田重進等會兵以進直抵幽州然後控扼險固恢復舊疆此朕之志也柰何將帥等不遵成筭各驛所見領十萬甲士出塞遠闢速取其郡縣更還師以援輜重往復勞弊為遼人所襲此責在主將也况朕踵百王之末粗致承平蓋念彼民陷於邊患將救焚而拯溺匪顯武以佳兵卿當悉之也疆場之事已為之備卿勿為憂卿社稷元臣忠言苦口三復來奏嘉愧實深普表謝曰昨以天兵久駐塞外未克恢復漸及炎蒸事危勢迫輒陳狂狷甘俟憲章陛下特鑑秉誠親糾宸翰密諭聖謀臣竊審命師討罪信為上策將

帥能遵成筭必可平定惟其不副天心由茲敗事今
既邊鄙有備更復何虞况陛下登極十年坐隆大業
無一物之失所見萬國之咸寧所宜端拱穆清齋神
和志自可遠繼九皇俯觀五帝豈必窮邊極武與契
丹較勝負哉臣素虧壯志矧在衰齡雖無功伐願竭
忠純觀者咸嘉其忠四年移山南東道節度自梁國
公改封許國公會詔下親耕籍田普表求入觀辭甚
懇切上惻然謂宰相曰普開國元臣朕所尊禮宜從
其請既至慰撫數四普嗚咽流涕陳王元僖上言曰
臣伏見唐太宗有魏玄成房玄齡杜如晦明皇有姚

崇宋璟魏知古皆任以輔弼委之心膂財成帝道康
濟九區宗祀延洪史策昭煥良由登上得其人也今
陛下君臨萬方焦勞庶政宵衣旰食以民為心歷考
前王誠無所讓而輔相之重未偕曩賢況為邦在於
任人任人在乎公正公正之道莫先於賞罰斯為政
之大柄也苟賞罰匪當淑慝莫分朝廷紀綱漸致隳
紊必湏公正之人典掌衡軸直躬敢言以辨得失然
後彝倫式序庶務用康伏見山南東道節度使趙普
開國元老參謀締構厚重有識不妄希求恩顧以全
祿位不私徇人情以邀名望此真聖朝之良臣也竊

聞愴巧之輩朋黨比周衆口嗷嗷惡直醜正恨不斥逐遐徼以快其心何者蓋慮陛下之再用普也然公讜之人咸願陛下復委以政啓沃君心羽翼聖化國有大事使之謀之朝有宏綱使之舉之四目未察使之明之四聰未至使之達之官人以材則無竊祿致君以道則無苟容賢愚洞分玉石殊致當使結朋黨以馳騖聲勢者氣索縱巧僥以援引儕類者道消沈寘廢滯得以進名儒懿行得以顯大政何患乎不舉生民何患乎不康匪踰期月之間可臻清靜之治臣知慮庸淺發言魯直伏望陛下旁采群議俯察物情

苟用不失實邦國大幸籍田禮畢太宗欲相呂蒙正以其新進籍普舊德為之表率冊拜太保兼侍中帝謂之曰卿國之勲舊朕所毗倚古人耻其君不及堯舜卿其念哉普頓首謝時樞密副使趙昌言與胡旦陳象輿董儼梁顥厚善會旦令翟馬周上封事排歎時政普深嫉之奏流馬周黜昌言等鄭州團練使侯莫陳利用驕肆僭侈大為不法普廉得之盡以條奏利用坐流商州普固請誅之其嫉惡彊直皆此類李繼遷之擾邊普建議以趙保忠復領夏臺故地因令圖之保忠反與繼遷同謀為邊患時論歸咎於普頗

為同列所窺不得專決舊制宰相以未時歸第是歲
大熱特許普夏中至午時歸私第明年免朝謁止日
赴中書視事有大政則召對冬被疾請告車駕屢幸
其第省之賜予加等普遂稱疾篤三上表求致仕上
勉從之以普為西京留守河南尹依前守太保兼中
書令普三表懇讓賜手詔曰開國舊勲惟卿一人不
同他等無至固讓俟首塗有日當就第與卿為別普
捧詔涕泣因力疾請對賜坐移晷頗言及國家事上
嘉納之普將發車駕幸其第淳化三年春以老衰久
病令留守通判劉昌言奉表求致政中使馳傳撫問

凡三上表乞骸骨拜太師封魏國公給宰相奉料令
養疾俟損日赴闕仍遣其弟宗正少卿安易齋詔書
賜之又特遣使賜普詔曰卿頃屬微疴懇求致政朕
以居守之重慮煩耆耄至維師之命用表尊賢佇聞有
瘳與朕相見今賜羊酒如別錄卿宜愛精神近醫藥
強飲食以副朕眷遇之意七月卒年七十一卒之先
一歲普生日上遣其子承宗齋器幣鞍馬就賜之承
宗復命未幾卒次歲普已罷中書令故事無生辰之
賜特遣普姪婿左正言直昭文館張秉賜之禮物普
聞之因追悼承宗秉未至而普疾篤先是普遣親吏

甄潛詣上清太平宮致禱神為降語曰趙普宋朝忠
臣久被病亦有冤累耳潛還普力疾冠帶出中庭受
神言涕泗感咽是夕卒上聞之震悼謂近臣曰普事
先帝與朕故舊能斷大事嚮與朕嘗有不足衆所知
也朕君臨以來每優禮之普亦傾竭自效盡忠國家
真社稷臣也朕甚惜之因出涕左右感動廢朝五日
為出次發哀贈尚書令追封真定王賜謚忠獻上撰
神道碑銘親八分書以賜之遣右諫議大夫范杲攝
鴻臚卿護喪事轉絹布各五百匹米麪各五百石葬
日有司設鹵簿鼓吹如式二女皆笄普妻和氏言願

為尼太宗再三諭之不能奪賜長女名志願號智果
大師次女名志英號智圓大師初太祖側微普從之
游既有天下普屢以微時所不足者言之太祖豁達
謂普曰若塵埃中可識天子宰相則人皆物色之矣
自是不復言普少習吏事寡學術及為相太祖常勸
以讀書晚年手不釋卷每歸私第闔戶啓篋取書讀
之竟日及次日臨政處決如流既薨家人發篋視之
則論語二十篇也普性深沈有岸谷雖多忌克而能
以天下事為已任宋初在相位者多輕齷循默普剛
毅果斷未有其比嘗奏薦某人為某官太祖不用普

明日復奏其人亦不用明日普又以其人奏太祖怒碎裂奏牘擲地普顏色不變跪而拾之以歸他日補綴舊紙復奏如初太祖乃悟卒用其人又有群臣當遷官太祖素惡其人不與普堅以為請太祖怒曰朕固不為遷官卿若之何普曰刑以懲惡賞以酬功古今通道也且刑賞天下之刑賞非陛下之刑賞豈得以喜怒專之太祖怒甚起普亦隨之太祖入宮普立於宮門久之不去竟得俞允太宗入弭德超之讒疑曹彬不軌屬普再相為彬辨雪保證事狀明白太宗嘆曰朕聽斷不明幾誤國事即日寃遂德超遇彬如

舊祖吉守郡為姦利事覺下獄案劾爰書未具郊禮
將近太宗疾其貪墨遣中使諭旨執政曰郊赦可特
勿貸祖吉普奏曰敗官抵罪宜正刑辟然國家卜郊
肆類對越天地告于神明奈何以吉而隳陛下赦令
武太宗善其言乃止真宗咸平初追封韓王二年詔
曰故太師贈尚書令追封韓王趙普識冠人彝才高
王佐翊戴興運光啓鴻圖雖呂望肆伐之勲蕭何指
縱之効殆無以過也自輔弼兩朝周旋三紀茂巖廊
之碩望分屏翰之劇權正直不回始終無玷謀猷可
復風烈如生宜預享於大蒸永同休於宗祐茲為茂

典以答舊勲其以普配饗太祖廟庭普子承宗羽林
大將軍知潭鄆二州皆有聲承煦成州團練使弟固
安易固至都官郎中

安易字季和建隆初攝府州錄事參軍節度使折德
扆言其清幹遂命即真再遷河南府推官會普居相
位十年不赴調太平興國中歷華邢二鎮掌書記部
芻糧至太原城下拜監察御史知興元府轉殿中賜
絳魚袋先是兩川民輸稅者以鐵錢易銅錢安易言
其非便請許納鐵錢詔從之九年起拜宗正少卿知
定州會以曹璨知州徙安易為通判未幾代歸又表

求外任命知耀州留不遣命按視北邊事淳化中嘗建議以蜀地用鐵錢準銅錢數倍小民市易頗為不便請如劉備時令西川鑄大錢以十當百下都省集議吏部尚書宋琪等言劉備時蓋患錢少因而改作今安易之請反患錢多非經久計也而安易論請不已仍募工鑄大錢百餘進之極其精好俄墜殿階皆碎蓋鎔鑠盡其精液矣太宗不之詰猶嘉其用心賜以金紫且遣其典鑄既而大有虧耗歲中裁得三千餘緡衆議喧然遂罷之事具食貨志歷知襄廬二州就遷宗正卿歸朝復領卿職時屬籍未備奏請纂錄

咸平初乃命梁周翰與安易同修安易略涉書傳性
強狠好談世務而疎闊不可用初太宗嘗問農政安
易請復井田之制又以其家本燕薦多訪以邊事景
德初禮官詳定明德皇太后靈駕發引於京師壬地
權攢依禮埋懸重升祔神主安易上言禮云既虞作
主虞者已葬設吉祭也明未葬則未立虞主及神主
所以周制但鑿木為懸重以主神靈王后七月而葬
則埋懸重掩玄堂凶仗輶轎車龍輶之屬焚於柏城
訖始可立虞主吉仗還京備九祭復埋虞主然後立
神主升廟室自曠古至皇朝上奉祖宗陵廟行此禮

何以今日乃違典章苟且升祔方權攢安立神主未
太塋輒埋懸重且棺柩未歸園陵則神靈豈入太廟
柰柏城未焚凶仗則凶穢唐突宗望約孝章近例
但於壬地權攢未立神主升祔凶儀一切祗奉俟丙
午年靈駕西去園陵東回祔廟如此則免於顛倒不
利國家乃詔有司再加詳定判禮院孫何等上言按
晉書羊太后崩廢一時之祀天地明堂去樂不作又
按禮王后崩五祀之祭不行既殯而祭所言五祀不
行則天地之祭不廢遂議以園陵年月不便湏至變
禮從宜又緣先準禮文候神主升祔畢方行享祀若

俟丙午歲則三年不祭宗廟禮文有闕况明德皇太后德配先朝禮合升祔遂與史館檢討同共參詳以為廟未祔則神靈不至伏恐祭祀難行攢既畢則祔宮在郊可以塋禮比附遂按禮云塋者藏也欲人不得而見也既不欲穿墉動土則龍輶攢木題湊蒙櫟上四柱如屋以覆盡塋之所合埋重一依近例便可升祔神主安易妄言以凶仗為凶穢目群官為顛倒指梓宮為棺柩令百司分析園陵澆瀆聖聰誣罔臣下安易又云昔日覩群官盡公奉二帝諸后並先山陵後祔廟今日覩群官顛倒奉明德皇太后獨先祔

廟後園陵者今詳當時先山陵後祔廟正為年月便順別無陰陽拘忌今則年月未便理合從宜未埋重則禮文不備未升祔則廟祭猶闕湏從變禮以合聖情兼明德皇太后將赴權攢而安易所稱柏城未焚凶仗則凶穢唐突祖宗按檀弓云喪之朝也順死者之孝心也鄭玄注云謂遷柩於廟又云其哀離其室也故至於祖考之廟而後行商朝而殯於祖周朝而遂葬今亦遙辭宗廟而後行豈可以禮經所出目為顛倒吉凶具儀謂之唐突哉又云孝章皇后至道元年崩亦緣有所嫌避未赴園陵出京權攢之時不立

神主入廟直至至道三年西去園陵禮畢然後奉虞
主還京易神主祔廟以合典禮今詳當時文籍緣孝
章為太宗嫂氏上僂之時止輟五日視朝百官不曾
成服與今不同從初亦無詔命令住廟享今明德皇
太后母儀天下主上孝極曾顏况上僂之初即有遺
命權停享祀今按禮文固合如此安易荒唐庸昧妄
有援引以大功之親比三年之制欺罔君上乃至於
斯况安易以訐直自負所詆者無非良善以清要自
高所尚者無非鄙俗名宦之志老而益堅詩書之文
懵而不習本院所議並明稱典故旁考時宜雖曰從

權粗亦稽古請依元議施行從之安易又屢言陵廟事詞多鄙俚晚歲進趨不已時論嗤之二年卒年七十六贈工部尚書錄其子承慶為國子博士孫從政為太常寺奉禮郎

論曰自古創業之君其居潛舊臣定策佐命樹事建功一代有一代之才未嘗乏也求其始終一心休戚同體貴為國卿親若家相若宋太祖之於趙普可謂難矣陳橋之事人謂普及太宗先知其謀理勢或然事定之後普以一樞密直學士立於新朝數年范王魏三人罷相始繼其位太祖不亟於酬功普不亟於

得政及其當揆獻可替否惟義之從未嘗以勲舊自
伐偃武而修文慎罰而薄斂三百餘年之宏規若平
昔素定一旦舉而措之太原幽州之役終身以輕動
為戒後皆如其言家人見其斷國大議閉門觀書取
決方用他日竊視乃魯論耳昔傳說告商高宗曰學
于古訓乃有獲事不師古以克永世匪說攸聞普為
謀國元臣乃能矜式徃哲著龜聖模宋之為治氣象
醇正茲豈無助乎晚年廷羨多遜之獄大為太宗盛
德之累而普與有力焉豈其學力之有限而猶有患
失之心歟君子惜之

列傳卷第十五

列傳卷第十六

宋史二百五十七

開儀同司上贊國錄軍國事前書奏丞相蘇國公領經運事都繼義晏晚等奉
勅修

吳廷祚

子元輔元載

李崇矩

子繼昌

王仁瞻

子繼隆繼和

楚昭輔

李處耘

子繼隆繼和

吳廷祚字慶之并州太原人少頗讀書事周祖為親校廣順初授莊宅副使遷內軍器庫使知懷州入為皇城使會天平符彥卿移鎮大名以廷祚權知鄆州世宗即位遷右羽林將軍充內客省使未幾拜宣徽

北院使世宗征劉崇為北面都巡檢使師還權判澶
州歸闕加右監門衛大將軍俄遷宣徽南院使判河
南府知西京留守事汴河決命廷祚督丁壯數萬塞
之因增築堤防自京城至臨淮數旬訖工世宗北征
權東京留守是夏河決鄭州原武縣命廷祚發近縣
丁壯二萬餘塞之師還以廷祚為左驍衛上將軍檢
校太傅充樞密使恭帝即位加檢校太尉宋初加同
中書門下三品以其父名璋故避之會李筠叛廷祚
白太祖曰潞城臨險且阻太行賊據之未易破也筠
素勇而輕若速擊之必離上黨來邀我戰猶獸亡其

數魚脫於淵因可擒矣太祖遂親征以延祚留守東京兼判開封府筠果領兵來戰澤州南其衆敗走及討李重進又為東京留守建隆三年夏帝謂之曰卿掌樞務有年于茲與卿秦州以均勞逸明日制出恐卿以離朕左右為憂故先告卿即以為雄武軍節度先是秦州夕陽鎮西北接大藪多材植古伏羌縣之地高防知州日建議就置采造務調軍卒分番取其材以給京師西夏酋長尚波于率衆爭奪頗傷役卒防捕繫其黨以狀聞上令廷祚代防賚詔赦尚波于等夏人感悅是年秋以伏羌地來獻乾德二年來朝

改鎮京兆開寶四年長春節來朝俄遇疾車駕臨問命爇艾灸其腹遣中使王繼恩監視之未幾卒年五十四贈侍中官給葬事廷祚謹厚寡言性至孝居母喪絕水漿累日好學聚書萬餘卷治家嚴肅尤崇奉釋氏子元輔元載元範元袞元吉元慶元範元慶仕皆至禮賓副使元吉閭門極候元吉子昭允太子中舍元慶子守仁內殿崇班

元輔字正臣頗好學善筆札周廣順中以父任補供奉官世宗嗣位遷洛苑使宋初授左驍衛將軍澶州巡檢累官至定州鉉轄卒年四十八子昭德昭遜昭

普並閣門祗候

元載建隆初授太子右春坊通事舍人賜緋魚袋廷
祚出鎮秦雍並補衙門都校廷祚卒授供奉官太平
興國三年加閣門祗候與太祝母賓古使契丹九年
擢為西上閣門副使出知陝州雍熙三年徙知秦州
州民李益者為長道縣酒務官家饒於財僮奴數千
指恣橫持郡吏短長長吏而下皆畏之民負息錢者
數百家郡為督理如公家租調獨推官馮炕不從益
遣奴數輩伺炕按行市中拽之下馬因毀辱之先是
益厚賂朝中權貴為庇護故累年不敗及炕屢表其

事又為邸吏所匿不得達後因市馬譯者附表以聞
譯因入見上其表帝大怒詔元載逮捕之詔書未至
京師權貴已報益益懼亡命元載以聞帝愈怒詔州
郡物色急捕之獲於河中府民郝氏家鞠于御史府
具得其狀斬之盡沒其家益子仕衡先舉進士任光
祿寺丞詔除籍終身不齒益之伏法民皆飯僧相慶
端拱初遷西上閭門使淳化二年加領富州刺史俄
徙知成都府蜀俗奢侈好遊蕩民無贏餘悉市酒肉
為聲技樂元載禁止之吏民細罪又不少貸人多怨
咎及王小波亂元載不能捕滅受代歸闕而成都不

守時李仕衡通判華州常銜元載因事殺其父伺元
載至闕遣人閱行裝收其關市之稅元載拒之仕衡
抗章疏其罪坐責郢州團練副使移單州以疾授左
衛將軍致政卒年五十三子昭明為內殿崇班昭矩
太子中舍

元袞字君華太平興國八年選尚太宗第四女蔡國
公主授左衛將軍駙馬都尉明年正月領愛州刺史
是冬領本州團練使雍熙三年有事北邊元袞表求
試劇郡命知鄆州逾年召入尋知河陽還朝改鄆州
觀察使特詔朝會序班次節度使奉祿賜予悉增之

再知河陽淳化元年以主疾召還主薨復遣之任五年秋霖河溢奔注溝洫城壘將壞元袞躬涉泥淖督工補塞民多構木樹杪以避水元袞命濟以舟楫設餌餉以食時澶陘悉罹水災元袞所部賴以獲安真宗即位換安州觀察使俄知澶州咸平三年轉運使劉錫上其治狀詔書嘉獎遷寧國軍留後知定州時王超王繼忠領兵踰唐河與遼人戰元袞度其必敗乃急發州兵護河橋既而超輒果敗遼人乘之至橋見陣兵甚盛遂引去考滿吏民詣闕貢馬疏其善政十事願借留樹碑表其德政詔褒之屬歲旱吏白召

巫以土龍請雨元袞曰巫本妖民龍止獸也安能格天惟精誠可以動天乃集道人設壇潔齋三日百拜祈禱澍雨沾洽景德三年代歸拜武勝軍節度三年以陵域積水議堙掘溝澗命為脩諸陵都部署以內侍副都知閻承翰副之出知潞州初并代澤潞皆分轄戍卒後并於太原至是以元袞臨鎮遂分領澤潞晉絳磁隰威勝七州軍戎事委元袞專總之東封表求扈從命祀青帝禮畢加檢校太傅知徐州大中祥符四年以杞汾陰恩改領山南東道五月制書下元袞被疾卒年五十贈中書令謚忠惠子弟進秩者五

人五年壅元袞時上元欲觀燈帝為移次夕元袞性謹讓在藩鎮有憂民心待賓佐以禮喜讀春秋左氏聲色狗馬一不介意所得祿賜即給親族孤貧者將赴徐州請對言臣族屬至多其堪祿仕者皆為表薦餘皆均奉贍之公主有乳媼得入參宮禁元袞慮其去後妄有請託白上拒之真宗深所嘉嘆於帝壇中獨稱其賢及歿甚悼惜之且以元袞得疾本州不以聞詔効其官屬子守禮至六宅使澄州刺史以帝甥特贈和州防禦使守嚴至內殿崇班天禧中錄守嚴子承嗣承緒並為殿直守良為內殿崇班守讓閭門

祇候

李崇矩字守則潞州上黨人幼孤貧有至行鄉里推服漢祖起晉陽次上黨史弘肇時為先鋒都校聞崇矩名召署親吏乾祐初弘肇總禁兵兼京城巡檢多殘殺軍民左右懼稍稍引去惟崇矩事之益謹及弘肇被誅獨得免周祖與弘肇素厚善即位訪求弘肇親舊得崇矩謂之曰我與史公受漢厚恩戮力同心共獎王室為姦邪所構史公卒罹大禍我亦僅免汝史氏家故吏也為我求其近屬吾將恤之崇矩上其母弟福崇矩素主其家盡籍財產以付福周祖嘉之以

崇矩隸世宗帳下顯德初補供奉官從征高平以功轉供備庫副使改作坊使恭帝嗣位命崇矩告哀於南唐還判四方館事宋初李筠叛命崇矩率龍捷驍武左右射禁軍數千人屯河陽以所部攻大會砦拔之斬首五百級改澤潞南面行營前軍都監與石守信高懷德羅彥瓌同破筠衆於磧子谷及平澤潞遣崇矩先入城收圖籍視府庫因上言曰上黨臣鄉里也臣父尚橐塋願護櫬歸京師許之賜予甚厚歸還會判三司張羨出鎮拜右監門衛大將軍充三司使從征李重進還為宣徽北院使仍判三司乾德二年

代趙普拜樞密使五年加檢校太傅時劒南初平禁
軍校呂翰聚衆構亂軍多亡命在其黨中言者請誅
其妻子太祖疑之以語崇矩崇矩曰叛亡之徒固當
孥戮然案籍合誅者餘萬人太祖曰朕恐有被其驅
率非本心者乃令盡釋之翰衆聞之亦稍稍自歸未
幾翰敗滅開寶初從征太原會班師命崇矩為後殿
次常山被病帝遣太醫診視命乘涼車還京師崇矩
叩頭言涼車乃至尊所御是速臣死爾固辭得免時
趙普為相崇矩以女妻普子承宗相厚善帝聞之不
悅有鄭伸者客崇矩門下僅十年性險詖無行崇矩

待之漸薄伸銜之因上書告崇矩陰事崇矩不能自明太祖釋不問出為鎮國軍節度賜伸同進士出身以為酸棗主簿仍賜器幣襲衣銀帶六年崇矩入為左衛大將軍太平興國二年夏河防多決詔崇矩乘傳自陝至滄棣按行河堤是秋出為邕貴潯賓橫欽六州都巡檢使未幾移瓊崖儋萬四州都巡檢使麾下軍士咸憚於行崇矩盡出器皿金帛凡直數百萬悉分給之衆乃感悅時黎賊擾動崇矩悉抵其洞穴撫慰以己財遺其酋長衆皆懷附代還拜右千牛衛上將軍雍熙三年命代宋渥判右金吾街仗兼六軍

司事端拱元年卒年六十五贈太尉謚元靖崇矩性
純厚寡言尤重然諾嘗事史弘肇及貴見其子孫必
厚禮之振其乏絕在嶺海四五年恬不以炎荒嬰慮
舊涉海者多艤舟以俟便風或旬餘或彌月崇矩往
來皆一日而渡未嘗留滯士卒僮僕隨者皆無恙信
奉釋氏飯僧至七十萬造像建寺尤多又喜黃白術
自遠迎其人館於家以師之雖知其詐猶以為神仙
試已終無悔恨子繼昌

繼昌字世長初崇矩與太祖同府厚善每太祖誕辰
必遣繼昌奉幣為壽嘗畀弱弓輕矢教以射法建隆

三年蔭補西頭供奉官太祖欲選尚公主崇矩讓
不敢當繼昌亦自言不願崇矩亟為繼昌聘婦太祖
聞之頗不悅開寶五年選魏咸信為駙馬都尉繼昌
同日遷如京副使崇矩出華州補鎮國軍牙職入為
右班殿直東頭供奉官監大名府商稅歲課增羨會
詔擇廷臣有勞者府以名聞丁外艱服闋授西京作
坊副使淳化中齊饑多盜命為登萊沂密七州都巡
檢使至道二年蜀賊平餘黨頗嘯聚拜西京作坊使
峽路二十五州軍捉賊招安都巡檢使旋改兵馬鈐
轄賊酋喻雷燒者久為民患以金帶遺繼昌繼昌僞

納之賊懈不設備因掩殺之進西京左藏庫使咸平
三年王均亂蜀與雷有終上官正石普同受詔進討
砦于城西門賊忽開城僞遁有終等各以所部徑入
繼昌覺亟止之不聽因獨還砦賊果閉關發伏悉陷
之有終等僅以身免繼昌按堵如故所部諸校聞城
中戰聲泣請引去繼昌曰吾位最下當俟主帥命是
夕有終馳報至徙繼昌屯鴈橋門三月破彌牟砦斬
首千級大獲器仗進逼魚橋門均脫走繼昌入城嚴
戒部下無擾民者獲婦女童幼置空寺中俟事平遣
還其家繼昌急領兵追賊至資州聞均梟首乃還以

功領獎州刺史俄知青州入掌軍頭引見司景德二年將幸澶州遣先赴河上給諸軍鎧甲遼人請和欲近臣充使乃令繼昌與其使姚東之偕詣遼部俄與韓杞同至行在及遼人聘至又命至境首接伴尋擢為西上閣門使三年又副任中正使契丹是冬將朝陵寢以汝州近洛衛兵所駐命知州事兼兵馬鈐轄駕還召歸出知延州兼鄜延路鉅轄大中祥符元年進秩東上閣門使俄以目疾求歸京師入對勞問再三遣尚醫診視假滿仍給以奉少愈令樞密院傳旨將真拜刺史復任延安繼昌以疾表求休致未幾改

右驍衛大將軍領郡如故祀汾陰留為京師新城巡
檢鉞轄改左神武軍大將軍權判右金吾街仗其子
遵鼎尚萬壽長公主天禧初主誕日邀繼昌過其家
迎拜為壽帝知之密以襲衣金帶器幣珍果美饌賜
之翌日主入對帝問繼昌彊健能飲食拜連州刺史
出知涇州表求兩朝御書及謁拜諸陵皆許之二年
冬卒年七十二遣中使護櫬以歸錄其子贊善大夫
文晟為殿中丞殿直文旦為侍禁繼昌性謹厚士大
夫樂與之遊為治尚寬所至民懷之任峽路時與上
官正聯職正殘忍好殺嘗有縣胥護芻糧地遠後期

正令斬之繼昌徐為解貸焉鄭伸者早死其母貧餓嘗詣繼昌乞丐家人競前詣逐繼昌召見與白金百兩時人稱之遵易初尚主詔升為崇矩子授昭德軍留後駙馬都尉

王仁瞻唐州方城人少倜儻不事生產委質刺史劉詞遷永興節度署為牙校詞將卒遺表薦仁瞻材可用太祖素知其名請於世宗以隸帳下宋初授武德使出知秦州改左飛龍使建隆二年遷右領軍衛將軍充樞密承旨高繼冲請命以仁瞻為江南巡檢使繼冲入朝命知軍府乾德初遷左千牛衛大將軍

不踰月加內客省使二年春召赴闕擢為樞密副使
七月加左衛大將軍興師討蜀命仁瞻為鳳州路行
營前軍都監蜀平坐沒入生口財貨殺降兵致蜀土
擾亂責授右衛大將軍初劖南之役大將王全斌等
貪財軍政廢弛寇盜充斥太祖知之每使蜀來者令
陳全斌等所入賄賂子女及發官庫分取珠金等事
盡得其狀及全斌等歸帝詰仁瞻仁瞻歷詆諸將過
失欲自解帝曰納李廷珪妓女開豐德庫取金寶豈
全斌輩邪仁瞻不能對廷珪故蜀將也帝怒令送中
書鞫全斌等罪仁瞻以新立功第行降黜而已帝幸

洛以仁瞻判留守司三司兼知開封府事及召沈倫
赴行在以仁瞻為東京留守兼大內都部署駕還遂
判三司俄命權宣徽北院事太平興國初拜北院使
無判如故加檢校太保四年親征太原充大內部署
仍判留守司三司總轄裏外巡檢司公事師還加檢
校太傅五年仁瞻廉得近臣戚里遣人市竹木秦隴
間聯巨筏至京師所過關渡矯稱制免筭既至厚結
有司悉官市之倍收其直仁瞻密奏之帝怒以三司
副使范旻戶部判官杜載開封府判官呂端屬吏旻
載具伏罔上為市竹木入官端為秦府親吏喬璉請

託執事者貶旻為房州司戶載均州司戶端商州司
戶判四方館事程德玄武德使劉知信翰林使杜彥
圭日騎天武四廂都指揮使趙延溥武德副使竇神
興左衛上將軍張永德左領軍衛上將軍祁廷訓駙
馬都尉王承衍石保吉魏咸信並坐販竹木入官責
降罰奉是歲車駕北巡命仁瞻為大內部署七年春
以政事與僚屬相矛盾爭辯帝前仁瞻辭屈責授右
衛大將軍翌日改唐州防禦使月給奉錢三十萬仁
瞻之獲罪也兵部郎中判勾院宋琪及三司判官並
降秩先是仁瞻掌計司殆十年恣下吏為奸怙恩寵

無敢發者前年發范旻等事中外益畏其口會屬吏陳恕等數人率以皦察不畏強禦自任因議本司事有不協者朝參日恕獨出班持狀奏其事帝詰之仁瞻屈伏帝怒甚故及於譴而恕等悉獎擢琪與恕等聯事始合謀同奏至帝前而宋琪猶附會仁瞻故亦左降仁瞻既失權勢因快快成疾數日卒年六十六後帝因言及三司財賦謂宰相趙普等曰王仁瞻領邦計積年恣吏為姦諸場院官皆隱沒官錢以千萬計朕悉令罷之命使分掌仁瞻再三言恐虧舊數朕拒之未踰年舊獲千緡者為一二萬緡萬緡者為六

七萬緡其利數倍用度既足儻遇水旱即可免民租稅仁贍心知其非頗亦慙悖朕優容之子昭雍為崇儀副使

楚昭輔字拱辰宋州宋城人少事華師劉詞詞卒事太祖隸麾下以才幹稱甚信任之陳橋師還昭憲太后在城中太祖憂之遣昭輔問起居昭輔具言士衆推戴之狀太后乃安宋初為軍器庫使太祖親討澤潞及征淮揚並以昭輔為京城巡檢建隆四年擢知揚州使江表還命鈎校左藏庫金帛數日而畢條對稱旨開寶四年帝以其能心計拜左驍衛大將軍權

判三司六年遷樞密副使九年命權宣徽南院事太平興國初拜樞密使三年加檢校太傅從征太原加檢校太尉俄以足疾請告帝親臨問以所居湫隘命有司廣之昭輔慮侵民地固讓不願治帝嘉其意賜白金萬兩令別市第昭輔被疾家居近一歲始以石熙載代之昭輔不求解職上亦不忍罷會郊祀畢罷為驍騎衛上將軍逾年卒年六十九廢朝贈侍中命中使護其喪歸葬鄉里無子錄其兄子吉為供奉官敏為殿直昭輔性勤介人不敢干以私然頗吝嗇前後賜予萬計悉聚而畜之嘗引賓客故舊至藏中縱

觀且曰吾無汗馬勞徒以際會得此吾為國家守爾
後當獻于上及罷機務悉以市善田宅時論鄙之初
詞卒昭輔來京師問卜於瞽者劉悟悟為筮卦曰汝
遇貴人見奇表豐下者即汝主也宜謹事之汝當貴
矣及見太祖狀貌如悟言遂委質焉咸平三年錄第
之子諒為借職大中祥符八年又錄從孫鼎為右班
殿直吉至內殿崇班吉子隨敏子咸並進士及第隨
為太常博士咸屯田員外郎

李處耘潞州上黨人父肇仕後唐歷軍校至檢校司
徒從討王都定州契丹來援唐師不利肇力戰死之

晉末處耘尙幼隨兄處疇至京師遇張彥澤斬關而入縱士卒剽略處耘年猶未冠獨當里門射殺十數人衆無敢當者會暮夜遂退迨曉復鬪又殺數人鬪未解有所親握兵聞難來赴遂得釋里中賴之漢初折從阮帥府州召置門下委以軍務從阮後歷鄧滑陝邠四節度處耘皆從之在新平日折氏甥詣闕誣告處耘之罪周祖信之黜為宜祿鎮將從阮表雪其冤詔復隸麾下顯德中從阮遺表稱處耘可用會李繼勲鎮河陽詔署以右職繼勲初不為禮因會將吏宴射處耘連四發中的繼勲大奇之令升堂拜母稍

委郡務俾掌河津處耘白繼勲曰此津往來者懼有
姦焉不可不察也居數月果得契丹譖者索之有與
西川江南蠶書即遣處耘部送闕下太祖時領殿前
親軍繼勲罷鎮世宗以處耘隸太祖帳下補都押衙
會太祖出征駐軍陳橋處耘見軍中謀欲推戴遽白
太宗與王彥昇謀召馬仁瑀李漢超等定議始入白
太祖太祖拒之俄而諸軍大譟入驛門太祖不能却
處耘臨機決事謀無不中太祖嘉之授客省使兼樞
密承旨右衛將軍從平澤潞遷羽林大將軍宣徽北
院使討李重進為行營兵馬都監賊平以處耘知揚

州大兵之後境內凋弊處耘勤於綏撫奏減城中居
民屋稅民皆悅服建隆三年詔歸京師老幼渡道涕
泣累日不得去拜宣徽南院使兼樞密副使賜甲第
一區朗州軍亂詔慕容延劍率師討之以處耘為都
監入辭帝親授方略令會兵漢上先是朝廷遣內酒
坊副使盧懷忠使荆南覘勢強弱使還具言可取之
狀遂命處耘圖之處耘至襄州先遣閻門使丁德裕
假道荆南請具薪水給軍荆人辭以民庶恐懼願供
芻餼於百里外處耘又遣德裕諭之乃聽命遂令軍
中曰入江陵城有不由路及擅入民舍者斬師次荆

門高繼冲遣其叔保寅及軍校梁延嗣奉牛酒犒師

且來覘也處耘待之有加諭令翌日先還延嗣大喜

令報繼冲以無虞荆門距江陵百餘里是夕召保寅

等宴飲延釗之帳處耘密遣輕騎數千倍道前進繼
冲但俟保寅延嗣之還遽聞大軍奄至即惶怖出迎

遇處耘於江陵北十五里處耘揖繼冲令待延釗遂

率親兵先入登北門比繼冲還則兵已分據城中荆
人束手聽命即調發江陵卒萬餘人并其師晨夜趨

朗州又先遣別將分麾下及江陵兵趨岳州大破賊
於三江口獲船七百餘艘斬首四千級又遇賊帥張

從富於澧江擊敗之遂北至袁山砦賊棄砦走俘獲甚衆處耘釋所俘體肥者數十人令左右分噉之黠其少健者令先入朗州會暮宿砦中遲明延釗大軍繼至黠者先入城言被擒者悉為大軍所噉朗人大懼縱火焚城而潰會朗帥周保權年尚幼為大將汪端劫匿於江南砦僧寺中處耘遣麾下將田守奇帥師渡江獲之遂入潭州盡得荆湖之地初師至襄州衢肆鬻餅者率減少倍取軍人之直處耘捕得其尤者二人送延釗延釗怒不受往復三四處耘遂命斬於市以徇延釗所部少校司義舍於荊州客將王氏

家使酒兒恣王氏憇於處耘處耘召義呵責義又譖處耘於延釗至白湖處耘望見軍人入民舍良久舍中人大呼求救遣捕之即延釗圉人也乃鞭其背延釗怒斬之由是大不協更相論奏朝議以延釗宿將貲其過謫處耘為淄州刺史處耘懼不敢自明在州數年乾德四年卒年四十七廢朝贈宣德軍節度檢校太傅賜地葬於洛陽偏橋村處耘有度量善談當世之務居常以功名為已任荆湖之役處耘以近臣護軍自以受太祖之遇恩有以報故臨事專制不顧群議遂至於貶後太祖頗追念之及開寶中為太宗

納其次女為妃即明德皇后也子繼隆繼和自有傳
繼恂官至洛苑使順州刺史贈左神武大將軍繼恂
子昭遜為供備庫使處疇官至作坊使子繼凝
繼隆字霸圖幼養於伯父處疇及長以父蔭補供奉
官處耘貶淄州繼隆亦除籍會長春節與其母入貢
復舊官時權臣與處耘有宿憾者忌繼隆有才繼隆
因落魄不治產以游獵為娛乾德中平蜀選為果闈
監軍年方弱冠母憂其未更事將輔以處耘左右繼
隆曰是行兒自有立豈須此輩願不以為慮母慰而
遣之代還夜涉棧道雨滑與馬偕墜絕澗深十餘丈

結於大樹騎卒馳數十里外取火引綆以出之會征
江南領雄武卒三百戍邵州止給刀盾蠻賊數千陣
長沙南截其道繼隆率衆力戰賊遁去手足俱中毒
矢得良藥而愈部卒死傷者三之一太祖聞其勇敢
而器重之又與石曦率兵襲袁州破桃田砦追賊二
十里入潭富砦焚其梯衝芻糗復從李符督荆湖漕
運給征南諸軍吳人以王師不便水戰多出舟師斷
餉道繼隆屢與鬪糧悉善達日馳四五百里常令往
來覘候一日中途遇虎射殺之嘗獲吳將部送赴闕
至項縣而病斬其首以獻太祖益嘉之與吳人戰流

矢中額以所冠胄堅厚得不傷太祖察其才且追念
其父欲拔用之謂曰昇州平可持捷書來當厚賞汝
時內侍使軍中者十數輒皆同城陷獻捷會有機事
當入奏皆不願行而繼隆獨請赴闕太宗見其來時
城尚未下甚訝之繼隆度金陵破在旦夕因言在途
遇大風晦暝城破之兆也翌日捷奏至太祖召謂曰
如汝所料矣吳將盧絳聚衆萬餘攻掠州縣命繼隆
招來之江南平錄功遷莊宅副使從幸西洛改御營
前後巡檢使太平興國二年改六宅使嘗詔與王文
寶李神祐劉承珪同護浚京西河又與梁迥竇神寶

治決河遁體肥碩所乘舟弊不能濟繼隆易以己舟
已而繼隆舟果覆棲枯桑杪賴他舟以度從征太原
為四面提舉都監與李漢瓊領梯衝地道攻城西面
機石過其旁從卒仆死繼隆督戰無怠討幽州與郭
守文領先鋒破契丹數千衆及圍范陽又與守文為
先鋒大敗其衆于湖瞿河南後為鎮州都監契丹犯
邊與崔翰諸將禦之初太宗授以陣圖及臨陣有不
便衆以上命不可違繼隆曰事有應變安可預定設
獲違詔之罪請獨當也即從宜而行敗之于徐河四
年遷宮苑使領鳴州刺史護三交屯兵與潘美出征

北邊破靈丘縣盡畧其人以歸改定州駐泊都監嘗
領兵出土鎧砦與賊戰獲牛羊車帳甚衆詔書褒美
李繼遷叛命繼隆與田仁朗王侁率兵擊之四月出
銀州北破悉利諸族追奔數十里斬三千餘級俘蕃
漢老幼千餘梟代州刺史折羅遇及其弟埋乞首牛
馬鎧仗所獲尤多又出開光谷西杏子坪破保寺保
香族斬其副首領埋也已五十七人降銀三族首領
析八軍等三千餘衆復破沒邵浪悉訛諸族及濁輪
川東兔頭川西生擒七八十人斬首五十九級俘獲
數千計引師至監城吳移越移四族來降惟岌伽羅

膾十四族怙其衆不下迺與尹憲襲擊之夷其帳千
餘俘斬七千餘級俄改領環州團練使又護高陽關
屯兵從曹彬征幽州率兵助先鋒薛繼昭破其衆數
千於固安南下固安新城進克涿州矢中左股血流
至踵獲契丹貴臣一人彬欲上其功繼隆止之俄而
傳潛米信軍敗衆潰獨繼隆所部振旅而還即命繼
隆知定州尋詔分屯諸軍繼隆令書吏盡錄其詔旬
餘有敗卒集城下不知所向繼隆按詔給券俾各持
詣所部太宗益嘉其有謀三年遷侍衛馬軍都虞候
領武州防禦使契丹大入邊出為滄州都部署劉廷

讓與敵戰君子館先約繼隆以精卒後殿緩急為援既而敵圍廷讓數重繼隆引麾下兵退保樂壽廷讓力不敵全軍陷沒裁以單騎遁免上怒追繼隆赴闕令中書問狀既而得釋逾年加領本州觀察使端拱初制授侍衛馬軍都指揮使領保順節度九月出為定州都部署初朝議有寇至令堅壁清野勿與戰一日契丹驟至攻蒲城至唐河護軍袁繼忠慷慨請出師中黃門林延壽等五人以詔書止之繼隆曰閫外之事將帥得專乃與繼忠出兵戰數合擊走之二年冬送芻粟入威虜軍蕃將于越率騎八萬來邀王師

繼隆所領步騎裁一萬先命千人設伏城北十里而
與尹繼倫列陣以待敵衆方食繼倫出其不意擊走
之繼隆追奔過徐河俘獲甚衆嘗有詔廢威虜軍繼
隆言梁門為北面保障不可廢遂城守如故訖為要
地淳化初上遣使至定州密諭繼隆若契丹復入寇
朕當親討繼隆上奏曰自北邊肆孽邊邑多虞陛下
不知臣不材任以疆事臣敢不講求軍實震耀戎容
奉揚天聲以遏外侮然臣奉辭之日曾瀝愚衷誠以
蜂蟻之妖必就鯨鯢之戮臣子之分死生以之望不
議於親巡庶靡勞於天步今聆聖誨將決親征且一

人既行百司景從次舍驅馳郡縣供饋勞費滋甚殄
此微妖當責將帥臣雖駕弱誓死為期是歲契丹不
入邊議遂止四年夏召還太宗面獎之改領靜難軍
節度復遣還屯所時夏州趙保忠與繼遷連謀朝廷
患之又綏州牙校高文峯舉城效順河外蕃漢大擾
以繼隆為河西行營都部署尚食使尹繼隆為都監
以討之既而繼遷遁去擒保忠以獻初裨將侯延廣
監軍秦翰議請誅保忠及出兵追之繼隆曰保忠机
上肉爾當請於天子今繼遷遁去千里窮殲艱於轉
餉宜養威持重未易輕舉延廣等服其言會密詔廢

夏州隳其城繼隆命秦翰與弟繼和及高繼勲同入奏以為朔方古鎮賊所窺覦之地存之可依以破賊并請於銀夏兩州南界山中增置保戍以扼其衝且為內屬蕃部之障蔽而斷賊糧運皆不報至道二年白守宗守榮馬紹忠等送糧靈州為繼遷所邀敗於洛浦河上聞之怒亟命繼隆為靈環十州都部署是秋五路討繼遷以繼隆出環州取東關鎮由赤檉苦井路赴之繼隆以所出道回遠乏水請由橐駝路徑趨賊之巢穴且遣繼和入奏太宗召詰之知其必敗因遣周瑩齋手詔切責督其進軍赤檉瑩至繼隆以

便宜發兵不俟報與丁罕行十餘日果不見賊而還
諸將失期士卒困乏繼隆素剛因慙憤肆殺戮乃奏
轉運使陳絳梁鼎軍儲不繼並坐削秩三年春繼遷
以蕃部從順者衆遣其軍主史癿遇率兵屯橐駝口
西北雙堆以遏絕之執倉族蕃官癿遇來告繼隆遣
劉承蘊田敏會癿遇討之斬首數千級獲牛馬橐駝
萬計先是受詔送軍糧赴靈州必由旱海路自冬至
春而芻粟始集繼隆請由古原州蔚茹河路便衆議
不一繼隆固執論其事太宗許焉遂率師以進壁古
原州令如京使胡守澄城之是為鎮戎軍真宗即位

改領鎮安軍節度檢校太傅踰月召還加同中書門
下平章事解兵柄歸本鎮咸平二年丁內艱起復會
秋潦暴集蔡水壞岸繼隆乘危督士卒補塞自辰訖
午衝波稍息四年加檢校太師王師失利於望都繼
隆累表求詣闕面陳邊事因乞自效俄召還延見詢
訪因言醜類侵擾蓋亦常事願委將帥討伐不煩親
征真宗慰諭之改山南東道節度判許州景德初明
德皇太后不豫詔入省疾九月復許會葬是冬契丹
大入踰魏郡至河上真宗幸澶淵繼隆表求扈從命
為駕前東西排陣使先赴澶州陳師於北城外暨車

為營敵數萬騎急攻繼隆與石保吉率衆禦之追奔
數里及上至幸北門觀兵召問慰勞見其所部整肅
歎賞久之翌日幸營中召從臣飲宴二年春還京加
開府儀同三司食邑實封詔始下會疾作上親臨問
繼和時為并代鈐轄驛召省視卒年五十六車駕臨
哭之慟為制服發哀贈中書令謚忠武以其子昭慶
為洛苑使從子昭■昭遜並為內殿崇班又錄其門
下二十餘人乾興初詔與李沆王旦同配享真宗廟
庭繼隆出貴胄善騎射曉音律慷慨自樹深沉有城
府嚴於御下好讀春秋左氏傳喜名譽賓禮儒士在

太宗朝特被親信每征行必委以機要真宗以元舅之親不欲煩以軍旅優游近藩恩禮甚篤然多智用能謙謹保身明德寢疾欲面見之上促其往繼隆但詣萬安宮門拜牋終不入又嘗命諸王詣第候謁繼隆不設湯茗第假王府從行茶爐烹飲焉昭慶改名昭亮至東上閣門使高州刺史

繼和字周叔少以蔭補供奉官三遷洛苑使淳化後繼隆多在邊任繼和常從行友愛尤至每令入奏機事繼隆罷兵柄手錄唐李勣遺戒授繼和曰吾門不墜者在爾矣初繼隆之請城鎮戎軍也朝廷不果於

行繼和面奏曰平涼舊地山川險阻旁扼夷落為中華襟帶城之為便太宗乃許焉後復不守咸平中繼和又以為言乃命版築以繼和知其軍兼原渭儀都巡檢使城畢加領平州刺史建議募貧民及弓箭手墾田積粟又屢請益兵朝議未許上曰苟緩急部署不為濟師則或至失援矣命繼和兼涇原儀渭鉅轄時繼遷未弭命張齊賢梁顥經略因訪繼和邊事繼和上言鎮戎軍為涇原儀渭北面杆蔽又為環慶原渭儀秦熟戶所依正當回鶻西涼六谷吐蕃咩逋賊遇馬城梁家諸族之路自置軍已來克張邊備方於

至道中所葺今已數倍誠能常用步騎五千守之涇
原渭州苟有緩急會于此軍弁力戰守則賊必不敢
過此軍而緣邊民戶不廢耕織熟戶老幼有所歸宿
此軍苟廢則過此新城止皆廢壘有數路來寇若自
隴山下南去則由三百堡入儀州制勝關自瓦亭路
南去則由彈箏峽入渭州安國鎮自清石嶺東南去
則由小盧大盧潘谷入潘原縣若至潘原而西則入
渭州東則入涇州若自東石嶺東公主泉南去則由
東山砦故彭陽城西並入原州其餘細路不可盡數
如以五千步騎令四州各為備禦不相會合則兵勢

分而力不足禦矣故置此城以扼要路即令自靈環慶鄜延石隰麟府等州以外河曲之地皆屬於賊若更攻陷靈州西取回鶻則吐蕃震懼皆為吞噬西北邊民將受驅劫若以可惜之地甘受賊攻便思委棄以為良策是則有盡之地不能供無已之求也臣慮議者以調發芻糧擾民為言則此軍所費上出四川地里非遙輸送甚易又劉琮方興屯田屯田若成積中有備則四州稅物亦不湏得况今繼遷強盛有踰曩日從靈州至原渭儀州界次更取鎌子山以西接環州山內及平夏次并黃河以東以南隴山內外接

儀州界及靈州以北河外蕃部約數十萬帳賊來足
以鬪敵賊遷未盛不敢深入今則靈州北河外鎮戎
軍環州並北徹靈武平夏及山外黃河以東族帳悉
為繼遷所吞縱有一二十族殘破奔逆事力十無二
三自官軍瀚海失利賊愈猖狂群蕃震懼絕無鬪志
無以咸平二年棄鎮戎後繼遷徑來侵掠軍界蕃族
南至渭州安國鎮北一二十里西至南市界三百餘
里便於蕭關屯聚萬子米逋西鼠等三千以脅原渭
靈環熟力常時族帳謀歸賊者甚多賴聖謨深遠不
惑群議復置此軍一年以來蕃部咸以安集邊民無

復愁苦以此較之則存廢之說相失萬倍矣又靈州遠絕居常非有尺布斗粟以供王府今關西老幼疲苦轉餉所以不可棄者誠恐滋大賊勢使繼遷西取秦成之群蕃北掠回鶻之健馬長驅南牧何以枝梧昨朝廷訪問臣送芻糧道路臣欲自蕭關至鎮戎城若西就胡盧河川運送但恐靈州食盡或至不守清遠固亦難保青岡白馬曷足禦扞則環州便為極邊若賊從蕭關武延石門路入鎮戎縱有五七千兵亦恐不敵即回鶻西涼路亦斷絕伏見咸平三年詔書緣邊不得出兵生事蕃夷蓋謂賊如猛獸不拂其心

必且不動臣愚慮此賊他日愈熾不若聽驍將銳旅
屢入其境彼或聚兵自固則勿與鬪妖黨繚散則令
掩擊如此則王師逸而賊兵勞賊心內離然後大舉
及靈州孤壘戍守最苦望比他州尤加存恤且守邊
之臣內憂家屬之窘匱外憂姦邪之憎毀憂家則思
為不廉憂身則思為退迹思不廉則官局不治思退
迹則庶事無心欲其奮不顧身令出惟行不可得已
良由賞未厚恩未深也賞厚則人無顧內之憂恩深
則士有效死之志古之帝王皆懸爵賞以拔英俊卒
能成大功大凡君子求名小人徇利臣為兒童時嘗

聞齊州防禦使李漢超守關南齊州屬州城錢七八
萬貫悉以給與非次賞賚動及千萬漢超猶私販榷
場規免商筭當時有以此事達于太祖者即詔漢超
私物所在悉免關征故漢超居則營生戰則誓死背
產厚則心有所繫必死戰則動有成績故畢太祖之
世一方為之安靜今如漢超之材固亦不少苟能用
皇祖之遺法選擇英傑使守靈武高官厚賞不吝先
與往日留半奉給其家半奉資其用然後可以責潔
廉之節保必勝之功也又戎事內制或失權宜漢時
渤海盜起冀遂為太守尚聽便宜從事且渤海漢之

內地盜賊國之饑民況靈武絕塞西鄙彊戎又非渤海之比苟許其專制則無失事機縱有營私冒利民政不舉亦乞不問用將之術異於他官貪勇知愚無不皆錄但使法寬而人有所慕則久居者安心展體竭材盡慮何患靈州之不可守哉又朝廷比禁青鹽甚為允愞或聞議者欲開其禁且鹽之不入中土困賊之良策也今若謂糧食自蕃界來雖鹽禁不能困賊此鬻鹽行賄者之妄談也蕃粟不入賊境而入于邊廩其利甚明况漢地不食青鹽熟力亦不入蕃界博易所禁者非徒糧食也至於兵甲皮榦之物其名

益多以朝廷雄富猶言摘山煮海一年商利不入則或闕軍湏况蕃戎所賴止在青鹽禁之則彼自困矣望固守前詔為便五年繼和領兵殺衛埋族於天麻川自是壠山外諸族皆恐懼內附願於要害處置族帳砦柵以為戍守繼和因請移涇原部署於鎮戎以壯軍勢又請開道環延為應援真宗以其精心戎事甚嘉之戎人伺警巡弛備一夕塞長壕越古長城抵城下繼和與都監史重貴出兵禦之賊據險再突城隍列陣接戰重貴中重創敗走之大獲甲騎有詔嘉獎別出良藥繡帛牢酒以賜繼和習武藝好談方略

頗知書所至幹治然性剛忍御下少恩部兵終日擐
甲常如寇至及較閱之際杖罰過當人多怨焉真宗
屢加勗勵且為覆護之嘗上言保捷軍新到屯所多
亡命者請優賜緡錢苟有亡逸即按軍法舊制凡賜
軍中雖緣奏請者亦以特旨給之上以繼和峻酷欲
軍士感其惠特令以所奏著詔書中而加賜之且以
計情定罪自有常制不許其請終以邊防之地慮人
不為用遣張志言代還既即路軍中皆恐其復來六
年又出為并代鈐轄將行請對欲領兵去按度邊壘
上曰河東巖險兵甲甚衆賊若入寇但邀其歸路自

可致勝不必率兵而往也景德初北邊入寇徙北平
砦車駕駐澶淵繼和受詔與魏能張凝領兵赴趙州
蹕敵後契丹請和邊民猶未寧又命副將張凝為緣
邊巡檢安撫使事平復還并代時朝廷每詔書約束
邊事或有當行極斷之語官吏不詳深意即處大辟
繼和言其事乃詔自今有云重斷極斷處斬決配之
類悉湏裁奏先是繼隆卒繼和耻以遺奏得官父之
遷西上閤門使未幾擢殿前都虞候領端州防禦使
大中祥符元年卒年四十六贈鎮國軍節度遣諸王
率宗室素服赴弔二子早卒帝以其族盛大諸姪皆

幼令三班選使臣為主家事第繼恂至洛苑使順州
刺史贈左神武大將軍子昭遜為供備庫使

論曰夫乘風雲之會依日月之光感慨發憤效忠駿
奔居備要任出握重兵如是而令名克終斯固可偉
也吳廷祚策李筠之破如目覩其事誠有將略李崇
矩秉純厚之德感史弘肇之恩保其叛亡之孥然交
鄭伸不知其傾險坐謫炎海固無先見之明矣其子
繼昌忘父仇以恤伸母之貧雖非中道亦人所難王
仁瞻征蜀殺降附之卒肆貪矯之行鬱鬱而斃自貽
伊戚尚何尤乎楚昭輔當陳橋推戴太祖遣之入安

母后亦必可託以事者及為三司善於心計人不可
干以私然終以許直取寡信之名何歟處耘於創業
之始功參締構克荆山靖衡湘勢如拉枯而志昧在
和勲業弗究良可惜也幸聯戚畹之貴秉旄繼世抑
造物之報嗚此而豐彼歟

列傳卷第十六

[G e n e r a l I n f o r m a t i o
n]

书名 = 百衲本二十四史 宋史 76

作者 = (元) 脱脱等奉敕修

页数 = 196

出版社 = 商务印书馆

出版日期 = 1937

SS号 = 12460431

DX号 = 000007544167

url = http://book2.du
xiu.com/search?&cha
nnel=search>ag=&s
w=%B0%D9%F1%C4%B1%B
E%B6%F E%CA%A E%CB%C4
%CA%B7++%CB%C E%C A%B
7++76&year=§yea
r=&seb=0&pid=0&show
c=0&fenleilD=&Pages
=1&searchtype=1